

Երեսնամյա այսպիսի

ՄԱՅՐ ԱԹՈՒ ՍՈՒՐԲ ԷԶՄԻԱԾՆԻ
ԿՐՈՆԱԿԱՆ, ՄԵԿՎՈՒԹԱՅԻՆ,
ԼՐԱՏՎԱԿԱՆ ԵՐԿԵԱԲԱԹԱԹԵՐԹ

Մայր Աթոռ Սուրբ Էջմիածնում տեղի ունեցավ Գերագույն հոգևոր խորհրդի ժողով



ղեցու ծայրը և նվազեցնելու նրա հանրային ազդեցությունը: Կառավարության ղեկավարի հակակեղեցական պահվածքը, ազգային արժեքների և եկեղեցու դեմ նախաձեռնած գործընթացները հղի են կործանարար հետևանքներով և սպառնալիք՝ հայոց պետականությանը, մեր ժողովրդի միաբանությանը թե՛ հայրենիքում և թե՛ սփյուռքում: Այսպիսի գործողությունները պառակտում են հասարակությանը, տկարացնում են ազգի ոգին և հայրենամարտի բարձր գիտակցությունը՝ հատկապես առկա մարտահրավերների պայմաններում: Նման դատապարտելի ձեռնարկումները սպասարկում են արտաքին հայատյաց ուժերի նկրտումները՝ որոշակիորեն կապակցվելով ադրբեջանական քարոզչամեքենայի կողմից հայ ժողովրդին և Հայ եկեղեցուն ուղղված զրպարտությունների և կեղծ մեղադրանքների հետ:



Հայոց եկեղեցին, գիտակից իր հանձնառություններին, անշեղորեն շարունակելու է հոգեփրկչական և ազգապահպան առաքելությունը՝ ընդդիմանալով ազգավնաս ու կործանարար ընթացքներին և մշտապես հետամուտ լինելով պետության ու ազգի գերակա շահերի, մեր սրբազան արժեքների պաշտպանությանը: Եկեղեցու հարցերը լուծվում են եկեղեցական կարգերի ու կանոնների համաձայն և դուրս են պետական և քաղաքական գործիչների իրավասությունից: Հայաստանյայց Առաքելական Սուրբ Եկեղեցին մեկ ամբողջություն է իր հավատացյալ զավակներով և զինվորագրյալ հոգևորականներով՝ ի գլուխ ունենալով ազգընտիր Ամենայն Հայոց Հայրապետին: Կոչ ենք ուղղում իրավասու պետական մարմիններին՝ կասեցնել վարչապետի այս անօրինական և անհեռատես քաղաքականությունը: Հարկ չկա եկեղեցին մերքաշելու արհեստական օրա-

կարգեր և մղելու հակադարձման գործողություններին:

Այս մոր փորձության հանդիման հորդորում ենք մեր Սուրբ Եկեղեցու հավատավոր զավակներին լինել միաբան ու միասնական, առ հայրենիք և Սուրբ Եկեղեցին հավատարմությամբ ու զորեղ հավատքով հաղթահարել մեր ժողովրդի առջև ծառացած բոլոր մարտահրավերները և երբեք թույլ չտալ մեր ազգային հիմնասյունների սասանումը: Թող այս մերժելի մեքենայությունները պատժառ չդառնան հիասթափության և զայթակղության:

Աղոթում ենք առ Փրկիչ մեր Տեր Հիսուս Քրիստոս, որ վնասաբեր երևույթներով չխաթարվի հայրենական կյանքը, և աշխարհափյուռ մեր ժողովուրդը ապրի խաղաղության, բարօրության և առաջընթացի մեջ: Թող Տերը անսասան պահի հայոց պետականությունը և պայծառ՝ Հայաստանյայց Առաքելական մեր Սուրբ Եկեղեցին և Մայր Աթոռ Սուրբ Էջմիածինը՝ հավատավոր իր բոլոր զավակներով:

Նունիսի 2-ին Մայր Աթոռ Սուրբ Էջմիածնում, նախագահությամբ Ն. Ս. Օ. Տ. Տ. Գարեգին Երկրորդ Ճայրագույն Պատրիարք և Ամենայն Հայոց Կաթողիկոսի, տեղի ունեցավ Գերագույն հոգևոր խորհրդի ժողով, որին մասնակցում էին եպիսկոպոսներ և թեմակալ առաջնորդներ Հայաստանից ու սփյուռքից:

Ժողովում քննարկվեցին հայրենիքի առջև ծառացած մարտահրավերներին, եկեղեցի-պետություն հարաբերություններին և հասարակությանը հուզող մի շարք հիմնախնդիրների առնչվող հարցեր:

Մասնավոր անդրադարձ կատարվեց վարչապետի կողմից վերջին օրերին հրահրված հակակեղեցական ամոթալի արշավին: Այս կապակցությամբ Գերագույն հոգևոր խորհուրդը հանդես եկավ հայտարարությամբ:

Հայտարարություն

Հայաստանի վարչապետը պետական այրին անհարիր բառապաշարով, վիրավորանքներով և մեղադրանքներով հերթական արշավն է սկսել ընդդեմ Հայաստանյայց Առաքելական Սուրբ Եկեղեցու՝ օրենքից վեր դասելով իր անձը:

Հայիոյախառն, անվայել խոսույթներով հախտում հրապարակումները զուրկ են բարեկրթության տարրական նորմերից, ոտնահարում են մարդու հիմնարար իրա-

վունքները, կոպտորեն վիրավորում հավատացյալների կրոնական զգացմունքները և սքոլվում կեղծ սրտացավության հիմնավորումներով:

Եկեղեցամարտ այս կեցվածքը ակնհայտորեն թելադրված է քաղաքական նպատակներով և փորձ է նսեմացնելու ազգային կյանքում և միջազգային շրջանակներում հարգանք վայելող Հայոց եկեղեցու և եկեղեցականաց հեղինակությունը, լքեցնելու եկե-

ՀՀ առաջին նախագահ տիար Լևոն Տեր-Պետրոսյանն այցելեց Մայր Աթոռ Սուրբ Էջմիածին

Նունիսի 7-ին, Հայաստանի Հանրապետության առաջին նախագահ տիար Լևոն Տեր-Պետրոսյանն այցելել է Մայր Աթոռ Սուրբ Էջմիածին և առանձնագրույց ունեցել Գարեգին Երկրորդ Ամենայն Հայոց Կաթողիկոսի հետ:

Զրույցի ընթացքում նախագահն իր լիակատար աջակցությունն է հայտնել Վեհափառ Հայրապետին՝ միաժամանակ խստիվ դատապարտելով ավելի քան 1700-ամյա Հայոց եկեղեցու նկատմամբ ՀՀ իշխանությունների հակասահմանադրական ոտնձգությունը:



Գարեգին Երկրորդ Ամենայն Հայոց Կաթողիկոսը մեկնեց ԱՄԷ

Հունիսի 9-ին Ն. Ս. Օ. Տ. Տ. Գարեգին Երկրորդ Ճայրագույն Պատրիարք և Ամենայն Հայոց Կաթողիկոսը մեկօրյա այցով մեկնեց

Արաբական Միացյալ Եմիրություններ, ուր հանդիպում կունենա Կալկաթայի Սուրբ Նազարեթ եկեղեցու և Հայոց Մարդասիրական ճեմարանի հոգաբարձուների հետ՝ ճեմարանի գործունեությանն ու համայնքային կյանքին առնչվող հարցերի շուրջ:

Ամենայն Հայոց Կաթողիկոս Գարեգին Երկրորդի ուղերձը օդանավակայանում իրեն դիմավորելու եկած հազարավոր քաղաքացիներին

Սիրելիներ, գիտե՛ք, որ դուք եկել եք այստեղ՝ ձեր վրդովմունքը արտահայտելու վերջին օրերին հանրապետության վարչապետի կողմից եկեղեցու և մեր եկեղեցականության հասցեին թույլ տրված արտահայտությունների առնչությամբ: Գիտե՛ք, որ այդ արտահայտությունները՝ հնչեցված վարչապետի կողմից, համընդհանուր վրդովմունք են առաջ բերել մեր ժողովրդի զավակաց մեջ՝ ի սփյուռս աշխարհի:

Հավատում եմ, որ Աստծո ողորմությամբ և օգնականությամբ, ձեզ հետ միասին խոհեմորեն, առանց ավելորդ հուզականության, ընդվզումների՝ պիտի կարողանանք հաղթահարել այս դժվարությունը:

Ամբողջ մնացե՛ք ձեր հավատքի և առ եկեղեցին ունեցած ձեր սիրո և հավատարմության մեջ: Մենք ձեր այս վերաբերմունքը գնահատում ենք, բայց նաև ցանկանում ենք ասել, որ այն առավել ևս պարտավորեցնում է մեզ՝ եկեղեցականներին, մեր առաքելությունը մույն մվիրումով

ու հավատարմությամբ առ ձեզ, առ հայրենին մեր իրականացնելու արդյունավոր կերպով, անշեղորեն: Եվ մեր հորդորը պիտի լինի ձեզ միաժամանակ, սիրելիներ, որ այս դժվարին ժամանակներում ամուր ու հաստատուն պահենք միաբանությունը ազգային մեր կյանքում, թույլ չտանք, որ որևիցե կերպ մեր կյանքում տեղ գտնեն այնպիսի արարքներ ու գործողություններ, որոնք կվտանգեն մեր ազգային միասնությունը: Մենք հավատում ենք, որ մեր միասնական ջանքերով, մեր կարողությունների մեկտեղումով պիտի կարողանանք դիմակայել բոլոր փորձություններին և հարթել մեր կյանքի բոլոր դժվարությունները, լավատեսությամբ, հույսով և հավատով կերտել մեր և մեր զավակների վաղվա պայծառ օրը:

Աստված օգնական ու պահապան մեր ժողովրդին, այսօր և հավիտյանս...

ԸՆԴՈՒՆԵԼՈՒԹՅՈՒՆՆԵՐ ՎԵՀԱՐԱՆՈՒՄ Ամենայն Հայոց Կաթողիկոսն ընդունեց



Հունիսի 3-ին
**Լիբանանից ժամանած քույր եկեղեցիների
ներկայացուցիչներին**

Ն. Ս. Օ. Տ. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսն ընդունեց ուխտավորաբար Հայաստան և Մայր Աթոռ Սուրբ Էջմիածին ժամանած Մեկիտ Հունա-Կաթոլիկ եկեղեցու Լիբանանի և Ջահլե և Ֆուրզիլի թեմի առաջնորդ Իբրահիմ Եպիսկոպոս Իբրահիմին, Ամտիոքի և Համայն Արևելքի Հույն Ուղղափառ եկեղեցու Լիբանանի, Ջահլեի և Բաալբեքի թեմի առաջնորդ Միտրոպոլիտ Ամտուան Էլ Սուրիին՝ ուղեկցությամբ «Գարդենիա Լեբնիզ Ֆարմա» ընկերության հիմնադիր տնօրեն

Նիկոլաս Աբու Ֆայսալի: Ամենայն Հայոց Կաթողիկոսն իր օրհնությունը բերեց հյուրերին՝ գոհունակությամբ անդրադառնալով քույր եկեղեցիների հետ առկա փոխհարաբերություններին:

Իրենց հերթին Իբրահիմ Եպիսկոպոս Իբրահիմը և Միտրոպոլիտ Ամտուան Էլ Սուրին շնորհակալություն հայտնեցին Ամենայն Հայոց Հայրապետին ընդունելության համար՝ իրենց զորակցությունն ու աղոթակցությունը բերելով Հայ եկեղեցուն և հայ ժողովրդին:

Տեր Խաչեր քահանան Նորին Սրբությանը տեղեկացրեց, որ մինչև Հայաստան ժամանելը ավստրալահայերն ուխտավորաբար եղել են Արևմտյան Հայաստանում և այժմ, գտնվելով հայրենիքում, այցելել են Մայր Աթոռ Սուրբ Էջմիածին՝ ստանալու Ամենայն Հայոց Կաթողիկոսի հայրական օրհնությունը:

Վեհափառ Հայրապետը, իր օրհնությունը փոխանցելով հայրդիներին, գոհունակությամբ անդրադարձավ Ավստրալիայի հայ համայնքի հայրենամյակը ու եկեղեցատեր կյանքին: Նորին Սրբությունը նկատեց, որ աշխարհասփյուռ հայոց թեմերից մեկում ուխտագնացությունների կազմակերպումը

հայրենիքի համար դժվարին այս օրերին գոտեպնդում է հայրենաբնակ իրենց եղբայրներին ու քույրերին:

Այս առնչությամբ Հայոց Հայրապետը հորդորեց ներկաներին, որ իրենց այցի շրջանակներում նաև հանդիպումներ ունենան հայրենագրկված արցախցիների հետ՝ ի մոտո ծանոթանալու նրանց առջև ծառացած մարտահրավերներին և իրենց աջակցությունն ու զորակցությունը բերելու նրանց:

Վերջում Ամենայն Հայոց Կաթողիկոսն ուխտավորներին մաղթեց, որ Աստված մշտապես պահի ու պահպանի նրանց իր սիրո և խնամքի ներքո:



Հունիսի 12-ին
**Հայագիտական դասընթացներին մասնակից
սփյուռքահայ երիտասարդներին**

Ն. Ս. Օ. Տ. Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսն ընդունեց Մայր Աթոռ Սուրբ Էջմիածնում հունիսին մեկնարկված հայագիտական և կրոնագիտական դասընթացներին մասնակցելու նպատակով սփյուռքի տարբեր թեմերից ժամանած երիտասարդներին:


Ամենայն Հայոց Կաթողիկոսի օրհնությամբ Մայր Աթոռում կազմակերպված դասընթացների նպատակն է զորացնել երիտասարդների հայոց լեզվի և պատմության իմացությունն ու հոգևոր գիտելիքները, ինչպես նաև հնարավորություն ընձեռել հաղորդ դառնալու հայրենիքի հոգևոր-մշակութային ժառանգությանն ու արժեքներին: Հայրդիների համար կազմակերպվում են նաև մշակութային ծրագրեր և ուխտագնացություններ դեպի տարբեր արքեպիսկոպոսներ:

Ծրագիրը համակարգում է Մայր Աթոռ Սուրբ Էջմիածնի «Գարեգին Ա» կրթական կենտրոնի տնօրեն Գերաշնորհ Տ. Վահան Եպիսկոպոս Ռովհաննիսյանը: Ծրագրին կազմակերպչական հարցերին իրենց օգ-

տակարություն են բերում նաև Ղազարավանի միանձնուհիները:

Զրույցի ընթացքում, իր հայրական օրհնությունը բերելով սփյուռքահայ երիտասարդներին, Նորին Սրբությունն ուրախություն հայտնեց Սուրբ Էջմիածնում վերջիններիս համախմբման առիթով, հետաքրքրվեց նրանց առօրյայով և ուսումնառության ընթացքով: Վեհափառ Հայրապետը մասնավորապես ընդգծեց դասընթացների կարևորությունն ու օգտակարությունը գիտելիքների հարստացման, ազգային ոգու, առ հայրենին ու ազգայինը սիրո առավել ամրապնդման առումով:

Իր խոսքում Ամենայն Հայոց Կաթողիկոսը հորդորեց երիտասարդ հայրդիներին համախմբել իրենց Հայոց եկեղեցու շուրջ, ջանասիրությամբ շարունակել ուսումը և ձեռք բերած գիտելիքներով հարստացած, իբրև ազգի արժանավոր զավակներ, իրենց ներդրումն ունենալ հայրենիքի ու աշխարհասփյուռ հայ համայնքների առավել զորացման գործում:



Հունիսի 8-ին
Ավստրալիայից ժամանած ուխտավորներին

Ամենայն Հայոց Կաթողիկոսն ընդունեց Ավստրալիայի և Նոր Զելանդիայի հայոց թեմից ժամանած ուխտավորներին՝ ուղեկցությամբ Մեկուհի Սուրբ Աստվածածին եկեղեցու հոգևոր հովիվ Արժանապատիվ Տեր Խաչեր քահանա Հարությունյանի:

Սուրբ Աստվածածին եկեղեցու հոգևոր հովիվ Արժանապատիվ Տեր Խաչեր քահանա Հարությունյանի:

Հոգեգալստյան Պատարագ Մայր Աթոռ Ս. Էջմիածնում

Հունիսի 8-ին Մայր Աթոռ Սուրբ Էջմիածնում մշակվեց Հոգեգալստի տոնը: Տոնական պատարագը, որին ներկա էր նաև Ամենայն Հայոց Կաթողիկոս Գարեգին Երկրորդը, մատուցեց Վահան Եպիսկոպոս Ռովհաննիսյանը: Ընթերցվեցին Ս. Հովհան Ոսկեբերանի՝ Սուրբ Հոգուն նվիրված աղոթքները:

Լրատվական նյութերը՝
Մայր Աթոռ
Սուրբ Էջմիածնի
տեղեկատվական
համակարգի

Արարատյան շաբաթ

2025 թ. հունիսի 16–22-ը Հայաստանյայց Առաքելական Սուրբ եկեղեցին մշակու է Արարատյան շաբաթվա տոները, որոնց առիթով Ն.Ս.Օ.Տ.Տ. Գարեգին Երկրորդ Ծայրագույն Պատրիարքը և Ամենայն Հայոց Կաթողիկոսի օրհնությամբ հավատացելոց երկրպագության համար դուրս կբերվեն Սուրբ Էջմիածնի արքեպիսկոպոսի մատուցման:

Ստորև ներկայացնում ենք արարողությունների ժամանակացույցը:

Հունիս 16 — Սուրբ Հովսեփի մյուսն Կույսերի տոն

- Ժամը 10:30-ին՝ Սուրբ և Ամենա Պատարագ Սուրբ Հովսեփին վանքում,
- Ժամը 9:30-ին Մայր Աթոռ Սուրբ Էջմիածնից եկեղեցական թափորով Սուրբ Հովսեփին վանք կտարվեն Սուրբ Հովսեփին կույսի մատուցմանը,
- Սուրբ Պատարագի ավարտին կկատարվի Անդաստանի կարգ:

Հունիս 17 — Սուրբ Գայանյան Կույսերի տոն

- Ժամը 10:30-ին՝ Սուրբ և Ամենա Պատարագ Սուրբ Գայանե վանքում,
- Ժամը 10:00-ին Մայր Աթոռ Սուրբ Էջմիածնից եկեղեցական թափորով Սուրբ Գայանե վանք կտարվեն Սուրբ Գայանե կույսի մատուցմանը,
- Սուրբ Պատարագի ավարտին կկատարվի Անդաստանի կարգ:

Հունիս 19 — Սուրբ Հովհաննես Կարապետի և Աթանազիոսի տոն

- Ժամը 10:30-ին՝ Սուրբ և Ամենա Պատարագ Սուրբ Շողակաթ վանքում, ուր կտարվեն Սուրբ Հովհաննես Մկրտչի և Աթանազիոսի եպիսկոպոսի մատուցմանը:

Հունիս 21 — Սուրբ Գրիգոր Լուսավորչի՝ Վիրապից ելնելու տոն

- Ժամը 10:30-ին՝ Սուրբ և Ամենա Պատարագ Խոր Վիրապի վանքում, ուր տոնի առիթով կտարվեն Սուրբ Գրիգոր Լուսավորչի մատուցմանը:

Հունիս 22 — Կաթողիկե Սուրբ Էջմիածնի տոն

- Ժամը 11:00-ին՝ Սուրբ և Ամենա Պատարագ Միածնաէջ Մայր Տաճարում,
- Սուրբ Պատարագի ավարտին Ամենայն Հայոց Հայրապետի հանդիսապետությամբ կկատարվի մաղթանք Մայր Աթոռ Սուրբ Էջմիածնի անասանության և հավետ պայծառության համար:

- Տոնի առիթով դուրս կբերվեն՝
1. Տիրոջ Կենաց Փայտի մատուցքը,
 2. Աստվածամուխ Սուրբ Գեղարդը,
 3. Սուրբ Գրիգոր Լուսավորչի Աջը,
 4. Սուրբ Սահակ Պարթև Հայրապետի մատուցքը,
 5. Սուրբ Գրիգոր Նարեկացու մատուցքը,
 6. Հայոց Ցեղասպանության սուրբ մահադատների մատուցարանը,
 7. Սկզբնային մասանց պահարանը:

Մատուցմանը ժողովրդի երկրպագության համար կմնան մինչև 18:00-ն:

Ներումը՝ քրիստոնեական վարք

Ներողամտությունը քրիստոնեական կյանքի մեծագույն պատվիրաններից է: Առհասարակ, քրիստոնեությունը կարելի է սահմանել որպես Արարչի՝ Իր արարածների մեղքերը ներելու սքանչելախորհուրդ հանձնառություն. «Եկե՛ք իրար հետ քննենք,— Տիրոջ խոսքը երկրորդում է Եսայի մարգարեն,— եթե ձեր մեղքերը կրկնակի կարմիր են, ապա ես ձյան պես ճերմակ կդարձնեմ, եթե որդան կարմիր լինեն, կսպիտակեցնեմ բրդի պես» (Ես. 1:18): Աստված, առանց պատժելու սարսափեցնող նախապայմանի, կոչ է անում մարդկությանը՝ քննելու սեփական մեղքերը, անդարադառնալու դրանց կործանարար հետևանքներին, Իր՝ Տիրոջ օգնականությամբ նոր, սրբագործված մարդ դառնալու: Այս հրավերը չի ճանաչում ոչ մի պատմեշ. այն վեր է ազգային պատկանելությունից, հասարակական բաժանումներից, լեզվական ու մշակութային առանձնահատկություններից: Այն հաշտության մեկնված ձեռք է դեպի բոլոր ազգերը, սերունդներն ու ժողովուրդները:

Սուրբ Գրքում ներկայացվող առաջին մարդկանց անմեղ ընթացքն արգելված պտղի ճաշակումից հետո շեղվեց՝ սկզբնավորելով մեղքի տարածման անվերջանալի շղթան: Այդ մեծ շղթայի օղակներ են Կայենի նախանձոտությունը, Աբելի սպանությունն ու Ղանեքի մարդասպանությունը, նոյյան ջրհեղեղից առաջ մարդկանց համատարած բարոյալքվածությունը, բաբելոնյան շինարարների գոռոզամտությունը, Սողոմի ու Գոմորի այլասերությունը, Յակոբի՝ իր եղբայր Եսավի անդրաճիկության հանդեպ ունեցած հավակնոտությունը, Յովսեփի եղբայրների չարամտությունը և այսպես շարունակ: Անհատական օրինազանցություններն աստիճանաբար ստացան տարերային բնույթ՝ ընդգրկելով համայն ազգերն ու ժողովուրդները, և չարքի յուրաքանչյուր դրսևորումով մարդկություն էլ առավել հեռացավ իր Արարչից՝ աստիճանաբար կորցնելով անմիջական հաղորդակցությունն Աստծու հետ:

Մեղքի տարածումն աշխարհի չորս ծագերում կատարվեց աննկատ, կայծակնային արագությամբ՝ նման համավարկներին: Մարդիկ սկսեցին հակվել դեպի մեղքը, որովհետև մեղքը, կարծես, վերածվեց օրինաչափության, և բոլորը մեղավորությամբ կապվեցին միմյանց: Այսպես՝ եթե Կայենը սարսափում էր, որ իր եղբայր Աբելին սպանելու համար մարդիկ վրեժխնդիր կլինեն իրենից (տե՛ս Ծննդ. 4:14), ապա հետագայում, երբ գործվել էին բազմաթիվ սպանություններ, մարդասպաններն այլևս չէին վախենում հասարակական վրեժխնդրության հուժկու դատաստանից, որովհետև սպանությունը, կարծես, բնական օրինաչափություն էր դարձել:

Երկրորդ նորամաթանությամբ՝ այսօր էլ անկառավարելի մեղալից բարքերը ծնուն են բարոյալքված հասարակություններ, որոնց շրջանում պատվիրանազանցությունը դառնում է օրինաչափություն, Աստծու հաստատած օրենքները ոտնահարվում են համընդհանուր կերպով, և մարդկությունն ինչ-որ պահի սկսում է անգամ մոռանալ, որ երբևէ եղել են ի վերուստ սահմանված հստակ պատվիրաններ:

Այսօրինակ պատմություններով հարուստ է Սուրբ Գիրքը: Մարդ-

կության առաջին հավաքական մեղավորության պատկերը ներկայացվում է Նոյի ժամանակներում. «Տերը՝ Աստված, տեսավ, որ երկիրն ապականված է, որովհետև բոլորը երկրի վրա ապրում էին անօրեն կյանքով» (Ծննդ. 6:12): Աստված պատժեց մարդկությանը, պատժեց ջրհեղեղով՝ փրկելով միայն Նոյին ու նրա ընտանիքը: Բայց կործանարար ջրհեղեղից հետո Տերն ուխտ կապեց Նոյի հետ՝ ասելով. «Այլևս երկիրը չեմ անիծի մարդկանց գործերի համար: Քանի որ մարդկանց միջքը մանկուց շարունակ ձգտում է դեպի չարք, այլևս երբեք կենդանի ոչ մի էակի չեմ ոչնչացնի» (Ծննդ. 8:21): Այսկերպ Աստված առաջին անգամ մարդկությանը խոստացավ պատժի փոխարեն ներել, մահվան փոխարեն կյանք շնորհել: Մարդկությունը, իհարկե, չդադարեց ապրել մեղանշունով: Դեռ ավելին՝ մարդկային հնարամտությունն ստեղծեց մեղքի ու չարքի տարածման շատ ավելի մեծ մեթոդներ, և գերազանցեց Նոյի ժամանակների հասարակական եղծված բարքերը, սակայն Տիրոջ՝ Իր զավակներին ներելու որոշումը երբեք ու երբեք չկորցրեց իր ուժը:

Հետաքրքրական է նկատել, որ Սուրբ Գրքում Աստված բազմիցս կարևորագույն ծրագրեր է իրականացնում հենց մեղավոր մարդկանց միջոցով: Սովակի եղբայր Ահարոնը, սուրբ տալով ժողովրդի կռապաշտական ցանկություններին, ոսկե հորթ պատրաստեց և հանձնեց Սինա լեռան ստորոտում հավաքված Իսրայելի ժողովրդին, որ մյուսեղեն կուռքը դարձնեն իրենց պատկերացումների չաստվածը: Արարիչ Աստված, սակայն, միևնույն է, հենց Ահարոնին կարգեց քահանայապետ և իր ազգատոհմին՝ Աստծու քահանայական ցեղ:

Տիրոջ առջև մեղավոր էր նաև Դավիթ թագավորը, որը լինելով Աստծու ընտրյալն ու օծյալը և ունենալով մեծամեծ կարողություններ, սպասավորներ, ենթականեր, անձնական իշխանության տակ գտնվող զինվորականներ ու զործիչներ, ի վերջո, ունենալով Բարձրյալի անմիջական առաջնորդությունը՝ ընթացավ մեղաճշումի ճանապարհով, դավադրորեն սպանեց իր լավագույն զորավարներից քեսացի Ուրիային և տիրացավ նրա վայելչագեղ կնոջը՝ Բերսաբեին: Այսուհանդերձ, Աստված հենց Դավթի միջոցով կատարեց մարդկության փրկության Իր ծրագիրը. Փրկիչը՝ Աստծու Որդին, Դավթի Որդի անվանվեց:


Մեղավոր էր և Պետրոսը, երբ Հիսուս առաջին անգամ հանդիպեց նրան և Գեննեսարեթի ծովակում մեծ քանակությամբ ձկներ որսալու հրաշքը կատարեց: Միմյուսին Պետրոսը՝ հասկանալով, որ հրաշքի հետևում կանգնած է Աստված, փաթաթվեց Հիսուսի ծնկներին ու ասաց. «Ինձնից հեռու գնա, Տեր, որովհետև ես մեղավոր մարդ եմ» (տե՛ս Դուկ. 5:8): Հետագայում Պետրոսը քահանայապետի տան բակում նաև պետք է երեք անգամ ուրանար իր սիրելի Վարդապետին: Պետրոսի մեղավորության այս բոլոր հանգամանքները, սակայն, երբեք չխոչընդոտեցին, որ նա առանցքային դեր ունենա քրիստոնեության ձևավորման, կայացման և տարածման առաքելության մեջ՝ դառնալով այն վեմը, որի վրա Աստված հաստատեց Իր Սուրբ եկեղեցին:

Հեթանոսների առաքյալ Պողոսը նույնպես գերծ չէր մեղքերից ու չարագործություններից: Նախքան Տիրոջ կողմից կանչվելը նա էլ անողորմաբար կտտանքների էր ենթարկում Քրիստոսին հավատացողներին և Աստծու Որդու անվան համար պայքարողներին: Աստված, սակայն, Դամասկոսի ճանապարհին կանչեց Պողոսին, անդամագրեց Իր առաքյալների ընտրյալ բանակին, և նա մեկ մեղավոր ու չարագործ մարդ դարձավ Աստծու պատգամաբերն ու սպասավորը:

Այս ստվարաթիվ օրինակները պարզապես արձանագրումներ են ճշմարիտ այն իրողության, որ Աստված, իսկապես, կարող է բեկել մարդկանց սրտերը, մեղավորներին՝ մաքրագործել, անբարեգութ մարդկանց դարձնել ողորմած, չարիք պատճառողներից բարություն բխեցնել: Մարդկանց հոգիները շրջող և սրտերը հեղափոխող այդ ուժն աստվածային ներողամտությունն է, որի աղբյուրը սերն է: Աստված Իր օրինակով սովորեցնում է համայն արարածներին, որ չարությանը հնարավոր է հաղթել միայն բարությամբ, ատելության պարտությունը սիրո առատությամբ է լինում, իսկ սերը, համաձայն առաքյալի խոսքի, մեծահոգի է, բարյացակամ, չի նախանձում, չի մեծամտանում, չի գոռոզանում, միշտ տոկում է, միշտ հավատ է ընծայում, միշտ հույս տաժում, միշտ համբերում է: Ահա թե ինչու է Աստված համբերում կամ հանդուրժում, երբ որևէ մեկը սպանում է, դաժանություն է գործում, ցավ է պատճառում:

Աստված համբերում է, որովհետև համբերությունը սիրո հատկանիշ է, իսկ սերը համբերում է, որ պատիժը վերածվի ներման: Չէ՞ որ Աստված կարող էր վայրկենապես պատժել Հիսուսին խաչ հանող և ծաղրուծանակի ենթարկող զինվորներին, կամ այն զինվորը, որ քացախով և լեղիով խառնված սպունգը մոտեցնում էր տանջամահ լինող Քրիստոսի շուրթերին, կարող էր Աստծու ցասման ողջ զորությամբ դատապարտվել հենց խաչի առջև: Հրեա պաշտոնյաները խարդավանքների ու կեղծիքի գնով մի անմեղ մարդու խաչ հանեցին, մինչդեռ Աստված Իր օրենքների ու մարգարեների միջոցով խստագույնս պատվիրել էր գերծ մնալ բանասարկությունից և արդարությունը խեղաթյուրելուց: Այդուհանդերձ, այս բոլոր մարդիկ չպատժվեցին, որովհետև Տիրոջ բարկությունը երբեք ավելի մեծ չէ, քան Նրա ներողամտությունը, իսկ ներողամտությունը համբերում է այնքան, մինչև մարդը կանդրադառնա իր ընթացքին և դարձի կգա չար ճանապարհից:

Աստվածային ներումը Նոր Կտակարանում հասնում է իր գագաթնակետին Հիսուս Քրիստոսի միջոցով: Իր երկրային առաքելության ողջ ընթացքում Հիսուս ոչ միայն ուսուցանում է ներումի կարևորությունը, այլև այն մարմնավորում էր գործողություններով: Ներողամտության մասին Աստծու մարմնացյալ Որդու ամենակարևոր ուսուցումներից մեկը դրսևորվեց այն ժամանակ, երբ Պետրոսը հարցրեց Հիսուսին, թե քանի անգամ պետք է ների Իր դեմ մեղաճշողին, և Հիսուս պատասխանեց. «Քեզ չեմ ասում մինչև յոթ անգամ, այլ մինչև յոթանասուն անգամ յոթ» (Մատթ. 18:22)՝ ցույց տալով, որ ներումը չի կարող սահ-



Ունբրանդտ վան Ռեյն. Անառակ որդու վերադարձը, 1666/1669 թ.

մանափակվել թվերի, չափերի կամ հաշիվների մեջ. ներումը պետք է լինի անսահման: Քրիստոսի այս ուսուցումը ոչ միայն հորդոր էր մարդկային հարաբերությունների վերաբերյալ, այլև աստվածային ողորմության բանաձևի բացահայտում, որտեղ ներումը չունի չափ ու սահման:

Քրիստոնյաների համար ներումն անընդհատական սիրո գործողություն է, արմատական հրաքառում՝ վրեժխնդրության կամ մեղսորդության մարդկային հակվածությունից: Ներումի կարևորությունը մասնավոր կերպով ընդգծվում է հատկապես Տերունական աղոթքում, որտեղ Հիսուս սովորեցնում է Իր աշակերտներին Աստծուն ճշմարտապես աղոթելու ձևը. «Ների՛ր մեզ մեր պարտքերը, ինչպես մենք ենք ներում մեր պարտապաններին» (Մատթ. 6:12): Տերունական այս աղոթքը, կարծես, ներողամտության եռանկյուն է ստեղծում աղոթողի, Աստծու և այլ անձանց միջև: Այս եռանկյան մեջ Աստված միշտ ներում է, սակայն մեկ մյուս երկու կողմերից անգամ ենթե անմեղության միտ է գտնվում մյուսի նկատմամբ, ապա նրա ուղղությամբ փակվում է Աստծու ներողամտության ճանապարհը: Այս ուսուցումից պարզ է դառնում, որ քրիստոնյաները չեն կարող ակնկալել Աստծու գթությունը, եթե առաջին հերթին իրենք պատրաստ չեն ներելու իրենց ցավ պատճառողներին:

Հիսուս Իր առաքելության ողջ ընթացքում մարմնավորեց աստվածային ներման ընկալումը, և դա ամենագորեղ կերպով արտահայտվեց հատկապես խաչելության ժամանակ Իր վերջին խոսքերում: Աննկարագրելի ցավի և տանջանքի մեջ Հիսուս աղոթում է Իրեն խաչ բարձրացնողների համար՝ ասելով. «Հայր, ների՛ր դրանց, որովհետև չգիտեն, թե ինչ են անում» (Դուկ. 23:34): Ապշեցուցիչ այս հառաչանքն արտացոլում էր ոչ միայն Հիսուսի ողորմության խորությունը, այլև Աստծու բացառիկ սերն

Իր արարածների նկատմամբ: Այսկերպ Քրիստոս դարձավ ներումի կատարյալ տիպար և հոգևոր ներգործության աղբյուր Իր հետևորդների համար՝ սովորեցնելով, որ ներումն աստվածային բարձրագույն շնորհ է, որը կարող է հաղթահարել ամեն մեղք, ցավ ու տառապանք:

Իհարկե, ներումը պարզապես աստվածաբանական հասկացություն կամ բարոյական պարտավորություն չէ, այլ փոխակերպող ուժ է, բժշկություն՝ անհատի և մարդկանց կյանքում: Ներումն Աստծուց տրված պարգև է, որն ընձեռնում է հոգևոր ազատություն: Եկեղեցու սուրբ հայրերի գրություններում և ուսմունքներում ներողամտությունը հաճախ ընկալվում է որպես քրիստոնեական կյանքի կարևորագույն գործողություն, քանի որ այն օգնում է վերականգնել խաղաղությունն ու միասնությունը: Եկեղեցու մեծագույն հայրերից Սուրբ Հովհան Ոսկեբերանն ուսուցանում է, որ ներումն ազատող-արձակող առաքիմություն է. «Երբ մենք ներում ենք,— բացատրում է Հայրապետը,— արձակում ենք մեզ, բայց երբ հրաժարվում ենք ներել, կապում (բանտարկում) ենք մեր սեփական հոգին»:

Սուրբ Հովհան Ոսկեբերանի խոսքով՝ չներելը շղթայում է մարդկային հոգին դառնության և վիրավորանքի բանտում՝ խոչընդոտելով հոգևոր աճը: Ներման գործողությունը, սակայն, ազատում է զայրույթի բեռից և թույլ է տալիս մարդուն զգալ այն խաղաղությունը, որն Աստծուց է գալիս: Ներելով՝ քրիստոնյան արտացոլում է Աստծո սերը և ողորմությունը, ցույց է տալիս իր անձի արարչության մեջ հիմնադրված աստվածային պատկերն ու նմանությունը:

Քրիստոնեական կյանքում ներման կարևորությունն ընդգծվում է նաև Պողոս առաքյալի նամակներում, որտեղ առաքյալը հավատալով ներումի մշտապես հորդորում է ներել միմյանց՝ աստվածային ներողամտության օրինակով: ➔ էջ 4

Երբ ցնծում են միջակությունները և անհայրենիք գոյականները

«Նրանց աստվածը նրանց որովայնն է, և փառքը՝ իրենց ամոթը»

(Փիլ. 9:19):

Նիմա տարակուսում ենք՝ ո՞նց եղավ, ո՞ր հասանք և ո՞ր ենք գնում... «Արցախի կորուստից հետո տեղս չեմ գտնում».— ասում են շատերը: Գիտեմ՝ մեր ուրախությունները թունավորված են, բայց կան ուրախանալու մեծ ու փոքր առիթները բաց չթողնող էակներ՝ հայ ամուսնույ:

Ազգովին ամեներեկի մի քանի սխալ գործեցիմք, իսկ դրսերում «կրթված»-ները համբերատար քանդեցին, այսօր էլ գործում են մեր ու մեր հայրենիքի (ավելի ճիշտ՝ հայրենիքից մնացած այս մի բուռ հողի), մեր Սուրբ Եկեղեցու դեմ:

Աստվածային, համատիեզերական սերը դարձրինք սոսկ խոսք, սիրո օրենքներով ապրողներին հռչակեցինք խելագարներ: Մեր կյանքից վերացինք սերը, համդուրեցինք թրջամոլությունը կենցաղում, պատմության մեջ ու աշխարհագրական տարածքներում: Չոհաբերեցինք մեր զավակներին,

որ ազգային վերագարթոնքի ոչ մի հմարավորություն չմնա: Դավաճանեցինք ինքներս մեզ, մեր պապերից ու հայրերից ժառանգված հողին, սուրբ հավատին, դավաճանեցինք մեր եղբայրների ու որդիների թափած արյանը՝ տեր չկանգնելով հաղթանակին:

Գիրքը և հացը հայտնվեցին փողոցում՝ ոտքի տակ: Քանդեցինք հայ ընտանիքը, մեծ-փոքր հարաբերությունը, «իրավագուրկ» հայ կնոջ պաշտպանության անվան տակ սատանիզմ տարածեցինք:

Քանի՜ սերունդ ապրում ենք սփյուռքում՝ հայրենիք երգելով, բայց այնտեղ չապրելով:

Գերագնահատեցինք մշակույթի դերը՝ թիզ առ թիզ բորեմուն զիջելով մեր հողը: Ի՞նչ ազգային մշակույթ՝ առանց հողի...

Գավառացու չտեսությանը մայեցինք ուրիշների՝ իբր թե ձեռքերումներին, մամալեցիներ: Թույլ տվեցինք, որ աղանդավորները գրավեն տուն ու փողոց, ամենուր պարտադրեն իրենց ներկայությունը: Խոսեցինք ու խոսում ենք հայրենասիրությունից, բայց մեր կողքին գոյատևում են մեր հայրերի ու զավակների ազատագրած տա-

րածքները «գրավված» հայտարարողները:

«Չկորեցինք» ընտրություն կեղծողների ձեռքերը: Լուռ ու ներքին մախանձով հետևեցինք մեզ ու մեր երկիրը թալանողներին, մայեցինք պալատներին, փողոցում՝ աղբարկղի մեջ, հացի կտոր որոնողներին ու հայտարարեցինք, որ համրապետություն ենք: Կյանքի բոլոր ասպարեզներում ճանապարհ տվեցինք թերուհներին, օտար լեզվով սատանիզմ ուսանածներին ու քարոզողներին:

Սուտը դարձրինք կյանքի նշանաբան, իսկ հմտորեն ստողին հրավիրեցինք ղեկավարելու, որ սովորենք տեսնել ու լռել, թե ինչպես կարելի է օրը ցերեկով թքել մարդու վրա կամ ոհմակով հարձակվել ու ծեծել: Ազգովին տրվեցինք անհայրենիք խեղկատակների կամքին ու հանդիսատեսի անվորդով հանգստությանը՝ անտարբեր դիտում ենք նրանց բեմադրած ողբերգության հերթական արարը՝ հանում այն ապագայի, որ իբր թե կա: Մարդասեր ենք մեր երկրի, հողի, հավատի, ապագայի հաշվին, իսկ ապագա կա միայն թուրք կոչվելուց չամաչողների համար:

Գիրքը միշտ եղել է դաստիարակության միջոց, քանի որ առանց գրքի դժվար է պատկերացնել կրթության գործը: Ի՞նչ գրքեր են հրատարակվում հիմա մեր երկրում, դրանք որևէ կապ ունեն երկրիս ու մեր կյանքի հետ, թե՞ պատվերով սարքած հատորները, ինչպես ամեն ինչ, ևս դարձել են սատանիզմի քարոզի ու տարածման գործուն միջոց:

Չայրացուցիչ, բայց զարմանալի չէ անհայրենիք ու անհող զանգվածի ծրագրված գործունեությունը և՛ սփյուռքում, և՛ Հայաստան կոչվող այս մի բուռ երկրում: Այսպես կոչված քաղաքակրթված աշխարհն անմահանջ ձգտում է կասկածելի ու տարակուսելի անմտությունը ներկայացնել որպես նորարարություն, նոր հեռանկար ու փրկություն... Սրա կողքին ավելի ու ավելի զորեղ են դառնում անհավատությունն ու աստվածային շնորհները ժխտելու ճիգերը:

Հայի մարտունակ ու մարտաշունչ տեսակն է հող ու երկիր պահել դարեր շարունակ, ու փրկությունը ներսից է լինելու, ինչպես պնդում էր Հովհաննես Թումանյանը:

Մենք պիտի հեռու մնանք համաճարակի պես տարածվող սատանիզմի բոլոր դրսևորումներից՝ հասկանալով, որ այս ամենը լավի ու վատի, բարու և չարի, հոգևորի և նյութականի հարատև պայքար է:

Իսկական ազգայինը համամարդկային է, ու բացառված չէ, որ կործանման եզրին կանգնած մարդկության փրկության առաջին քայլերն սկսվեն մեզմիջ ու մեր հողից: Իսկական խաղաղությունն ու ժողովրդավարությունը երազանք չեն մնա, երբ մենք արժևորենք մեր ունեցածը, դարձրենք մեր արժեքներն օտարի կասկածելի չափանիշներով գնահատելուց, վերադառնանք մեր կենսունակ ու դիմացկուն արմատներին:

Իմաստուն մեկն ասել է, թե ինքը կխելագարվեր մարդկանց անարդարությունից, եթե չիմանար, որ վերջին խոսքն Աստծունն է:

Աստված ամեն վայրկյան գործում է մեր մի բուռ հողի վրա...

Ես հավատում եմ:

Մարգարիտա ԽԱՉԱՏՐՅԱՆ,
բ. գ. դ.

Ներումը՝ քրիստոնեական վարք

← էջ 3

Եփեսացիներին ուղղած իր մանկուն առաքյալը գրում է. «Միմյանց հանդեպ քաղցր ու գթած եղեք, մերեք միմյանց, ինչպես Աստված Քրիստոսի միջոցով ներեց մեզ» (Եփես. 4:32): Պողոս առաքյալի համար ներումը պարզապես հարկադրական պատվիրան չէ, այլ քրիստոնեական առաքինությունների՝ բարյացակամության, գթասրտության և խոնարհության հասնելու ճանապարհ:

Այսպիսով՝ ներումը մաս միջոց է՝ քրիստոնեական համայնքը զորացնելու, միմյանց կյանքում հաշտեցման մթնոլորտ ստեղծելու և եկեղեցական միասնությունը պահպանելու:

Եկեղեցու խորհրդակատարական կյանքում ևս կարևորված է ներելու առաքինությունը: Մեղքերի խոստովանության կարգի ժամանակ քրիստոնյաները բարձրաձայնում են իրենց գործած զանցանքները և ստանում Աստծու թողութունն ու վերստին չնեղանչելու հորդորը: Ապաշխարության այս խորհուրդի միջոցով ոչ միայն վերականգնվում է անհատի հարաբերությունը Աստծու հետ, այլև մեղավոր մարդուն հմարավորություն է տրվում վերադառնալու համայնքի գիրկը: Ապաշխարության խորհուրդը հզոր հիշեցում է, որ ներումն անձնական, անհատական, միակողմանի գործողություն չէ, այլ համայնքային, հավաքական մշակակություն ունեցող խիզախում: Ավելին՝ Սուրբ Հաղորդությանը մասնակցելուց առաջ քրիստոնյաները կոչված են միմյանց հետ հաշտության: Մատթեոսի Ավետարանում Հիսուս պատգամում է. «Եթե զոհասեղանին քո ընծան մատուցելու լինես և այնտեղ հիշես, թե եղբայրդ քո դեմ ունի, թող քո ընծան, գնա, մախ հաշտվիր եղբորդ հետ և ապա եկ, քո ընծան մատուցիր» (Մատթ. 5:23–24): Տիրոջ այս պատվերն ընդգծում է, որ ներումը մախապայման է Փրկչի Սուրբ Մարմինն ու Արյունը ճաշակելու համար: Սուրբ Հաղորդությունը, որպես Քրիստոսի հետ հաշտեցման ու միության խորհուրդ,

պահանջում է, որ քրիստոնյան այս սրբությանը մոտենա անբիծ սրտով, ինքն էլ իր հերթին մերի իր դեմ կատարված հանցանքները:

Եկեղեցու սուրբ հայրապետներից Բարսեղ Մեծը ներումն ընկալում է որպես քրիստոնեական միասնության հիմք: Սուրբ Հայրապետը գրում է. «Առանց ներման միություն լինել չի կարող: Որտեղ ներում կա, այնտեղ խաղաղություն ու ներդաշնակություն կա»:

Օգոստինոս երանելին էլ իր «Խոստովանություններ»-ում անդրադառնում է ներումի բուժիչ զորությանը՝ գրելով. «Եկեք ներենք միմյանց, քանի որ այդ կերպ մենք արտացոլում ենք Աստծո ողորմությունը: Ներումով մենք բժշկվում ենք, իսկ աններողամտությամբ՝ խոցոտվում»:

Այսպիսով՝ համաձայն սուրբ հայրերի՝ ներումն ընդամենը պասիվ գործողություն չէ, այլ աստվածային սիրո և ողորմության ակտիվ արտահայտություն ուղղված անհատական և համայնքային կյանքի բժշկությանը: Այն Աստծու պատվերն է և պարզել՝ բուժելու մեզ ման մեղավոր մարդկանց և այդպիսով բուժելու ինքներս մեզ: Որպես քրիստոնյաներ՝ մենք կոչված ենք ներելու, ինչպես Քրիստոս է ներում մեզ, հասկանալով, որ ներումը ոչ միայն հոգևոր ազատության ուղի է, այլև խաղաղություն բերելու միջոց՝ մեր արտերում, համայնքներում և ամբողջ աշխարհում: Ներելով՝ մենք մասնակից ենք դառնում Աստծու փրկագործությանը, վերածվում Նրա սերն ու շնորհները տարածողների:

Կարևոր է ընդգծել նաև, որ ներումը, իր հոգևոր բովանդակությունից զատ, մասն հոգեբանական խոր գործընթաց է, որը ենթադրում է բարդ հուզական և ճանաչողական փոփոխություններ: Ժամանակակից հոգեբանությունը ներումը սահմանում է որպես վրդովմունքի, թշնամանքի, մեղամշողի նկատմամբ վրեժխնդրության ցանկության և այլ բացասական զգացմունքների հաղթահարման գիտակցված դրսևորում: Հոգեբանական տեսանկյունից ներողամտություն



Աղանդե Կոստեր. Սուրբ Պետրոսի ուրացումը, 1650 թ.

նը ներառում է ճանաչողական քայլեր, որոնցից մեկը վերագնահատում է: Այն թույլ է տալիս ցավալի իրադարձությունն ընկալել այնպես, որ մվազեցի դրա հուզական ազդեցությունը: Օրինակ՝ մարդը կարող է հասկանալ, որ իրեն վիրավորած անձը գործել է անտեղյակության կամ անձնական ցավի ազդեցության պատճառով: Այլոց կողմից մեր հանդեպ գործված սխալների վերափոխաստվածում այս ձևը կարող է օգնել՝ մվազեցնելու հոգում կուտակված զայրույթը, մտնելու այլ անձանց դրության մեջ և, ի վերջո, գիտակցորեն ներելու մարդկանց:

Ներման մեկ այլ կարևոր գործն է զգացմունքային կարգավորումը կամ հույզերի կառավարումը: Մարդիկ, որոնք կարող են կառավարել իրենց զայրույթը, վիշտը կամ այլ զգացմունքներ, շատ ավելի սահուն են ազատվում վիրավորանքների բեռից: Ուսումնասիրությունները փաստում են, որ ներողամտությունը կապված է հուզական ինտելեկտի, այսինքն՝ սեփական հուզական վիճակներն ընկալելու, հասկանալու և կառավարելու ունակության հետ: Ավելի բարձր հուզական ինտելեկտ ունեցող անհատները հակված են ներելու թե՛ ուրիշներին, թե՛ իրենց: Ներողամտությունը մասն ուժգնացնում է կարեկցանքի զգա-

ցողությունը, որը, ըստ էության, սոցիալական վարքագծի անկունաքարն է: Մեղավորի հուզական աշխարհի ճանաչումն ու ապրումակցումը կամուրջ են ստեղծում կարեկցանքի ուժով հաղթահարելու իրեն պատճառված ցավը և ներելու իր դեմ մեղանշողին:

Նշյալ գործիքները կարևոր են կյանքում՝ ներման ամբողջական խորությունն ընկալելու համար, որովհետև տեսականորեն հրաշալի է հնչում Տերունական աղոթքի խնդրանքը՝ «Ներիր մեզ մեր պարտքերը, ինչպես մենք ենք ներում մեր պարտապաններին» (Մատթ. 6:12), սակայն գործնականում որքան դեպքեր են լինում, երբ մենք իրաժարվում ենք մեր հանդեպ անիրավություն գործած անձանց ներելուց՝ պատճառաբանելով կատարված հանցանքի մեծությունը: Ահա թե ինչու են հարկավոր մասն հոգեբանական գիտելիքները՝ ներման գործընթացը լիարժեքորեն իրականացնելու համար: Հոգեբանները մասն փաստում են, որ ներողամտությունը հանգեցնում է ընկճվածության հաղթահարման, հուզական կայունության հաստատման և մույնիսկ կյանքի իմաստի ու նպատակի ամրապնդման:

Ներողամտությունը, սակայն, բազմաբարդ գործընթաց է: Անձի թե՛ հոգևոր, թե՛ հոգեբանական

առողջության համար անհրաժեշտ է, որ ներումը լինի իրական և գիտակցված: Շատ արագ ներելը՝ հատկապես հոգևոր պատվիրանների բարոյական ճնշման ներքո, հնարավոր է պատճառ դառնալ չհասկացված հույզերի կուտակումների, որոնք էլ հետագայում կարող են դրսևորվել հոգեբանական ծանր տառապանքների տեսքով: Ուստի, կապված պատճառված ցավի աստիճանից և բնույթից, ներումը երբեմն կարող է տարբեր կերպով դրսևորվել: Օրինակ՝ բռնության կամ ծանր հանցանքների դեպքում ներումը կարող է մույնիսկ երկար սպասել տալ, այն անգամ կարող է երբեք էլ լիարժեքորեն տեղի չունենալ, սակայն մեծ իրավիճակներում հոգեբանները խորհուրդ են տալիս տառապողին ավելի շատ կենտրոնանալ անձնական սահմաններ հաստատելու և անձնական խաղաղության ուղիներ փնտրելու վրա, որոնք էլ իրենց հերթին տուժող անձի մեջ աստիճանաբար կզարգացնեն ներողամտության ճշմարիտ զգացողություն և ապրում:

Որպես ամփոփում՝ հարկ է վերստին նշել, որ ներողամտությունը քրիստոնեական կյանքի մեծագույն պատվիրան է, որի մասին պետք է մշտապես մտածել, պատրաստել մեզ տարբեր իրավիճակներում, ըստ անհրաժեշտության, համբերատարություն և ներողամտություն հանդես բերելու, հիշելու, որ ներել մշանակում է ներվել, իսկ ներվել մշանակում է մաքրվել մեղքերից: Ներումի միջոցով քրիստոնյաներիս կյանքը դառնում է հաշտեցման կյանք, մեր անձերը բժշկվում են, մեր հարաբերությունները՝ վերափոխվում: Ներման մեջ պետք է բացառենք հաշվենկությունը, չհաստատենք թվեր, չափ ու սահմաններ, այլ ներենք անսահմանորեն, «քանզի ում շատ է ներվում, շատ է սիրում» (Ղուկ. 7:47): Ուստի, ներենք, որովհետև Աստված ներում է մեզ ամեն քայլափոխի:

Արման սրկ. ԲՈՒՆԱՐՁՅԱՆ
Արմինե ՀՈՎՀԱՆՆԻՍՅԱՆ

Հոգեգալուստ

Հարցազրույց Վազգեն արքեպիսկոպոսի հետ

— Հայր սուրբ, Հոգեգալուստը՝ որպես Հայ Առաքելական Սուրբ Եկեղեցու տերունական տոն, ի՞նչ նախապատմություն և խորհրդաբանություն ունի:

— Սուրբ Հոգու էջըը՝ Հոգեգալուստը, քրիստոնեական եկեղեցու կարևորագույն տոներն է: Իհարկե, ինչ-ինչ պատճառներով Հայ Առաքելական Եկեղեցու տաղավար տոների շարքին չի դասվում, բայց իր կարևորությամբ փրկագործության պատմության նշանավոր իրադարձություններից է: Նախքան Սուրբ Հոգու գալստյան նորկտակարանյան պատմությունը Հին Կտակարանում արդեն մի քանի իրադարձություններ կային, որոնք ևս ուրվագծային կերպով պատմում էին Սուրբ Հոգու մասին: Օրինակ՝ Մովսեսի՝ Սինայ լեռան վրա աստվածային հայտնությունն օրենքի՝ տասը պատվիրանների միջոցով, կամ առավել հետ գնանք. բաբելոնյան աշտարակաշինության ժամանակ, երբ բոլորի լեզուները խառնվեցին, և իրար չէին հասկանում, ինչպես Նոր Կտակարանում Հոգեգալուստի ժամանակ: Ըստ այդ իրադարձության՝ Պենտեկոստին՝ Հիսուս Քրիստոսի Հարության հիսուներորդ օրը, Վերնատանը Սուրբ Հոգին իջավ առաքյալների վրա, և նրանք սկսեցին խոսել տարբեր լեզուներով, որոնք մինչ այդ չգիտեին: Եվ այս պատմության ամբողջ գեղեցկությունը հենց լեզվախոսության հրաշքի մեջ է: Ղուկասը հստակ ասում է, որ առաքյալներն սկսում են խոսել տարբեր լեզուներով, և թվարկում է դրանք: Մարդիկ ընդհուպ մտածում են, որ առաքյալները խմիչքից արբեցնում են, ինչին հաջորդում է Պետրոս առաքյալի բոցաշունչ ճառը, որը երեք հազար հոգու ապաշխարություն պատճառ դարձավ:

Հոգեգալուստը մեզ համար առանցքային նշանակություն ունի: Պետք է հասկանանք, որ մոտ երկու հազար տարի առաջ տեղի ունեցած հենց այս իրադարձության արդյունքում հիմնադրվեց քրիստոնեական Սուրբ Եկեղեցին, և կատարվեց Քրիստոսի խոստումը. «Իսկ Մխիթարիչը՝ Սուրբ Հոգին, որին Հայրը կուղարկի մե՛ն ամուսնով, Նա ձեզ ամեն բան կուսուցանի և կհիշեցնի այն ամենը, ինչ ես ասացի ձեզ» (Հովհ. 14:26): Այսպիսով՝ առաքյալներն ստանում են Սուրբ Հոգու շնորհները և սկսում քարոզչությունն ամբողջ աշխարհում:

— Իսկ ինչո՞ւ է տոնը համարվում ազատարար և պարզակից:

— Ինչպես նշեցինք, Վերնատանն առաքյալներն ստացան Սուրբ Հոգին՝ որպես ազատիչ ցանկացած երկյուղից և տագնապից: Բնականաբար, Քրիստոսի խաչելությունն ու հարությունն արդեն իսկ բավարար էին անկասկած հավատարմի և «գնալ քարոզելու» (Մատթ. 28:19) համար, սակայն առաքյալներին անհրաժեշտ էր նաև խիզախություն՝ հեթանոսներին դեմ դուրս գալու: Հոգեգալուստն ազատեց նրանց վախի հնարավոր բոլոր կապանքներից և համարձակություն տվեց քարոզելու և նահատակվելու: Այսպիսով՝ Հոգեգալուստն առաքյալներին ազատում է մահվան վախից և պարզևս շնորհներ, ինչպես, օրինակ, ուրիշ լեզվով խոսելը:

— Սուրբ Հոգու հրաշափառ երևանվելն Աստվածաշնչում ինչպե՞ս է պատկերված: Սուրբ Հոգու ի՞նչ գործուն դրսևորումներ կան Նոր Կտակարանում:

— Աստվածաշնչում Սուրբ Հոգու հայտնության ամենակարևոր դեպքի մասին արդեն խոսեցինք, բայց, դրանից զատ, կարևոր մի քանի դրվագ էլ կա: Նախ՝ Մարիամի որովայնում Հիսուսի մարդկային բնության սկզբնավորումը՝ իղացումը: Ըստ Աստվածաշնչի՝ Սուրբ Հոգին խորհրդավոր կերպով ձևավորում է մարդեղենացած Որդուն՝ առանց ամուսնական հարաբերության: Կամ ավետարանիչը գրում է, որ Քրիստոսի մկրտության ժամանակ՝ ջրից դուրս գալուց անմիջապես հետո, երկինքը բացվում է, և Աստծո Հոգին, ինչպես աղավմի, իջնում է Նրա վրա (Մատթ. 3:16):

Գիտե՞ք, որ նախքան քարոզչության սկիզբը քառասուն օր անապատում անցկացրեց, փորձությունների ենթարկվեց, և ինչպես Ղուկաս ավետարանիչն է ասում.

«Հոգով առաջնորդվեց անապատ» (Ղուկ. 4:1): Այս ամենից բացի՝ Նոր Կտակարանում Սուրբ Հոգին ներկայանում է նաև այլ կերպ՝ զորացնող, առաջնորդող և աստվածային ներկայությունը հայտնող: Քարոզչության ընթացքում Քրիստոս խոսում է դեպի ճշմարտություն առաջնորդող մխիթարիչ Սուրբ Հոգու մասին: Առաքելական նամակները ևս հարուստ են Սուրբ Հոգու առաջնորդության մասին պատմող զանազան դեպքերով: Օրինակ՝ առաքելական քարոզչության ժամանակ Սուրբ Հոգին կարող էր արգելել որևէ քաղաք մտնել կամ չմտնել (Գործք 16:6):

— Սուրբ Հոգին՝ որպես Սուրբ Երրորդության անտրոհելի Անձ, միաժամանակ բնորոշվում է առանձնահատկություններով: Որպես Էություն՝ ինչպե՞ս է ներկայացվում Սուրբ Հոգին դավանաբանական գրականության մեջ: Հայտնի է, որ հիմնական հատկություններից մեկն անորսակությունն է, որպես հուր, շունչ կամ օդ դրսևորվելը: Կբացահայտե՞ք դավանաբանական ամբողջական պատկերը:

— Հայ եկեղեցին դավանում է Սուրբ Երրորդությանը՝ Հորը, Որդուն և Սուրբ Հոգուն: Խոսքը երեք Անձի, բայց աստվածային մեկ բնության մասին է: Կարևոր է գիտակցել, որ Սուրբ Երրորդության գաղափարն ամբողջությամբ իմանալ կամ ընկալել անհնար է: Այս երեք Անձն ունի աստվածային մեկ և նույն բնությունը, երեքն էլ հավասար են փառքով և իրար չեն խառնվում կամ բաժանվում: Անձերից Սուրբ Հոգին, ըստ Հայ եկեղեցու դավանաբանության, բխում է Հորից Որդու միջոցով: Միևնույն ժամանակ Սուրբ Հոգին ունի Իր Անձին բնորոշ, եզակի հատկություններ:

Սուրբ Հոգին անստեղծ, ժամանակից դուրս՝ հավիտենական, սկիզբ չունեցող, ինքնուրույն, բայց ոչ անկախ գոյություն է: Շատ հաճախ ներկայացվում է խորհրդանշանորեն՝ Նրա ներգործությունը բացահայտելու նպատակով: Նրան ներկայացնում են որպես շունչ կամ քամի, քանի որ հնարավոր չէ որսալ. շոյում է, զգացվում, բայց բռնել-սահմանափակել անհնար է: Երբեմն բնութագրվում է որպես հուր-կրակ՝ մաքրագործող, լուսավորող, բոցավառող: Սրա լավագույն օրինակը հենց Հոգեգալուստի դրվագն է: Կարևոր խորհրդանշաններից է ջուրը՝ որպես մաքրագործող և կենսատու աղբյուր: Ի տարբերություն Հոր և Որդու՝ Սուրբ Հոգին մշտապես ընկալվել է եթերային կերպով: Մեր հայրերը, մատենագիրները երբեք չեն կարողացել մարմնավոր կերպարանքով պատկերացնել Սուրբ Հոգուն, ինչպես Քրիստոսին կամ Հորը, Որդը, Հին Ուխտի մարդու ընկալումով, հայտնվում էր Սինայ լեռան վրա և այլն: Այն մշտապես ընկալվել է խորհրդանշանորեն:

Սուրբ Հոգու դավանաբանական ճշգրիտ պատկերն ունենալու համար պետք է հիշենք մեր եկեղեցու հավատամքը՝ մասնավորապես Սուրբ Հոգուն առնչվող հատվածը. «Հավատում ենք նաև Սուրբ Հոգուն՝ անեղին և կատարյալին, որ խոսեց օրենքի և մարգարեների և Ավետարանների միջոցով: Որն իջավ Հորդանանի վրա, քարոզեց առաքյալների միջոցով և բնակվեց սրբերի մեջ»:

— Սուրբ Հոգին հայտնի է նաև իր յոթնարփյա շնորհներով, որոնք բաշխվեցին առաքյալներին: Որո՞նք են այդ շնորհները, և հասարակ մահկանացուներին հասանելի են դրանք արդյոք:

— Սուրբ Հոգին շնորհաբաշխ է: Ինչպես առաքյալները Հոգեգալուստին, մարգարեները մարգարեանալու ժամանակ, ավետարանիչները շարադրելիս ստացան շնորհներ, այնպես էլ հավատացյալը մյուռոնով դրոշմվելիս ստանում է դրանք:

Հոգեգալուստը Սուրբ Զատիկից յոթ շաբաթ հետո է և նշվում է յոթ օր: Այս գեղեցիկ ընթացքը կոչվում է յոթնարփյա շնորհների ընթացք: Վերնատանը, ինչպես ասացինք,



առաքյալներն ստացան յոթ կարևորագույն շնորհները՝ իմաստություն, գիտություն, զորություն, համճար, խորհուրդ, աստվածապաշտություն և երկյուղ: Սրանք միանգամայն սահմանափակ շնորհների շարք չեն: Աստված Ինքն է որոշում՝ ինչպիսի շնորհներով զարդարի Իր հավատացյալին: Օրինակ՝ Պողոս առաքյալը, խոսելով Սուրբ Հոգու պտուղների մասին, թվարկում է դրանք՝ սերը, խնդությունը, խաղաղությունը, համբերությունը, քաղցրությունը, բարությունը, հավատարմությունը, հեզությունը, ժուժկությունը (Գաղատ. 5:22–23): Անքննելիորեն, սրանք բոլորը յուրաքանչյուր հավատացյալի հոգու փրկության համար են, ուստի հասանելի են բոլորին:

— Ժամանակակից մարդու մեջ որքանով են այսօր ներկա Սուրբ Հոգին և Նրա շնորհները:

— Նախ՝ Հոգեգալուստով Սուրբ Հոգին հավիտենապես ներկա է Սուրբ Եկեղեցուն: Սուրբ Հոգին ժամանակին և փոփոխմանը ենթակա չէ, հետևաբար մշտապես նույնն է և այսօր էլ իրական, կենդանի ու ներգործող է եկեղեցուն: Նա է առաջնորդում, սրբագործում, մխիթարում և շնորհներ պարգևում յուրաքանչյուրին: Սուրբ Հոգին ներկա է ցանկացած մկրտված և մյուռոնով դրոշմված հավատացյալի մեջ:

Բնականաբար, ինչպես ասացինք, Աստված ժամանակից կախված չէ և չի փոփոխվում, նույնպես և մարդու հոգու կարիքները, որքան էլ փոփախ մարդկային աշխարհայացքը, միևնույն է, մնում են անփոփոխ: Հետևաբար անկախ նրանից՝ մարդը մի քանի հարյուր տարի առաջ է ապրում, թե՛ հիմա, Սուրբ Հոգին հավասարապես գործում է, և Նրա մխիթարության կարիքը, անկասկած, զգացվում է ցանկացածի հոգում: Սակայն Սուրբ Հոգու շնորհները հեղվում են բացառապես անձի փրկության և մարդկության փրկագործության իրականացման համար՝ երկու կողմի ցանկությամբ: Օրինակ՝ հոգեգալուստյան առավուրդ, երբ իրե լեզուներն իջան առաքյալների վրա, և նրանք սկսեցին խոսել տարբեր լեզուներով, նպատակ ունեցավ Քրիստոսի վարդապետության քարոզչությունը կազմակերպել հեթանոսների շրջանակներում: Առաքյալները դուրս եկան Իսրայելի տարածքից և լծվեցին այլալեզու հեթանոսների քարոզչությանը: Այսօր Սուրբ Հոգին «կարիք չունի» մարդկանց լեզուներ տալու, քանի որ աշխարհի

բոլոր լեզուներով քարոզիչներ կան, կամ Աստվածաշունչն աշխարհի ամենաշատ լեզուներով թարգմանված գիրքն է: Այսինքն՝ մարդիկ, որոնք իբրև թե սկսում են խոսել լեզուներով՝ այն էլ գոյություն չունեցող, Սուրբ Հոգու աստվածային տրամաբանությունից դուրս են: Հետևաբար՝ այսօրվա մարդը նույնպես ստանում է Սուրբ Հոգուց պարգևներ և շնորհներ՝ կախված այն բանից, թե ինչպես է դրանք գործածում իր կյանքում:

— Հոգեգալուստյան և մարդեղենացման կամ մարդեղենացման և Հոգեգալուստի փոխկապակցվածությունը կմեկնաբանե՞ք:

— Քրիստոնեական փրկագործության վարդապետության մեջ Հոգեգալուստն ու մարդեղենացումը խորապես փոխկապակցված իրողություններ են: Մարդեղացման սկիզբն այն պահն է, երբ Որդին՝ Բանը, անընկալելի կերպով Աստվածածնի արգանդում մարմն է առնում՝ դառնալով կատարյալ մարդ: Աստվածաշունչը հստակ ասում է, որ մարդեղացումը տեղի է ունենում Սուրբ Հոգով (Մատթ. 1:18): Իրականում սրանք մեր տկար մտքի համար ոչ լիարժեք ընկալելի եղելություններ են: Մենք միայն հավատքի աչքերով կարող ենք մայել և վստահել, որ Աստծո Բանը՝ Աստված, կատարյալ մարդ դարձավ, մեր մեջ բնակվեց՝ Իր աստվածային բնությամբ միավորելով ողջ մարդկային բնությունը, և սրբեց մեղքից: Իսկ հարությունից և համբարձուցից հետո Սուրբ Հոգին եկավ աշխարհ՝

մարդկանց փրկության՝ Աստծո ծրագիրը շարունակելու համար: Հետևաբար՝ մարդեղացումն առանց հոգեգալուստի ոչ ամբողջական կլինի կամ կմնար որպես պատմական իրադարձություն: Միևնույն ժամանակ հոգեգալուստը տեղի ունեցավ միայն մարդեղացման միջոցով, քանի որ Սուրբ Հոգին իջավ Քրիստոսի հիմնած եկեղեցու վրա: Հետաքրքիր ձևակերպում կա, որ մարդեղացումը Աստծո մոտենալն էր մարդուն, իսկ հոգեգալուստը՝ Աստծո բնակվելը մարդու մեջ: Այսպիսով՝ դրանք միևնույն փրկագործական ծրագրի երկու անբաժանելի իրադարձություններ են:

— Նոր Կտակարանի համաձայն՝ Հիսուս հարություն առավ, համբարձվեց երկինք ու նստեց Աստծու աջ կողմում, որ երկրորդ անգամ գա երկիր՝ կատարելու մեսիական մարգարեությունները: Որո՞նք են դրանք:

— Դա մարդկության կարևորագույն հարցերից է: Մեսիայի մասին մարգարեությունների զգալի մասն արդեն կատարվել է Հիսուսի մարդեղացմամբ: Եվ շուրջ երկու հազարամյակ ողջ քրիստոնյա աշխարհն սպասում է Հիսուս Քրիստոսի երկրորդ գալստյանը, որը պիտի լինի աշխարհի վերջին իրադարձությունը: Ըստ Նոր Կտակարանի՝ Քրիստոս պետք է վերադառնա՝ ողջերին և մեռածներին հարսելու համար, որից հետո արդարները հավիտենության մեջ փառավորելու են Աստծուն:

Բնականաբար, մեծ մարգարեությունների ամբողջական պատկերացումը շատ դժվար է: Ինչպես իրեաները հարյուրավոր տարիներ լսում էին Մեսիայի մասին, բայց երբ եկավ, չճանաչեցին, այդպես էլ քրիստոնյաներս, մինչև չլինեն այս իրադարձությունները, ճշգրիտ պատկերացնել չենք կարող:

Այսպիսով՝ Որդին աստվածային փառքով գալու է երկիր այնպես, որ բոլորն իմանան. մեռելները հարություն են առնելու, լինելու է ընդհանրական դատաստան, և չարը վերջնականապես պարտվելու է: Այս ամենից հետո հաստատվելու է Աստծո հավիտենական և անժամանակ թագավորությունը, որտեղ լինելու հույսով էլ բոլորս ապրում ենք:

— Հնորիակությունը հարցազրույցի համար, հայր Վազգեն:

— Ես եմ շնորհակալ այս հոգեշահ զրույցի համար: Սուրբ Հոգու շնորհները թող առատապես հեղվեն և զորացնեն մեզ բոլորիս:

Կյանքի խոհափիլիսոփայությունը «Ժողովող» գրքում

Աստվածաշնչի «Քերթողական-ուսուցողական» շարքի իմաստութեամբ գրքերից մեծ հետաքրքրություն է ներկայացնում «Ժողովող» գիրքը: Գրական-գեղարվեստական հարուստ ոճով գրված երախտերն այս գիրքն Աստվածաշնչի կանոնականացումից ի վեր («Ժողովող»-ը, նաև ԴԿ-ի մյուս գրքերը, ավարտուն տեսքի են բերվել և Սուրբ Գրքի կանոնում հաստատագրվել Ք. հ. 90 թ. Յամնիայի ժողովով) սուրբգրային բանասիրության և աստվածաշնչագիտության մեջ եղել է ամենից շատ ընթարկված և ուսումնասիրված սրբաշունչ գրքերից մեկը: Համաձայն ռաբինական ավանդության՝ այն գրել է Սողոմոն թագավորը (թագավորել է մոտ Ք. ա. 970–931 թթ.) իր ծերության ժամանակ, սակայն պարսկական փոխառությունների և արամեա-բանությունների առկայությունը մատնանշում է Ք. ա. մոտ 450-ից ոչ շուտ գրված լինելը. այսօր գիտական գրականության մեջ գրքի կազմման վերջին հնարավոր տարեթիվ է համարվում Ք. ա. 180 թվականը:

Ինչպես Սողոմոն Իմաստուն թագավորին վերագրված մյուս գրքերը («Առակաց», «Երգ երգոց», «Իմաստություն Սողոմոնի»), «Ժողովողը» ևս հարուստ է առակներով: Այստեղ «առակներ» ասելով՝ չպետք է պատկերացնել հայ բանասիրության գրական նույնանուն ժանրին հատուկ կառուցվածք ու բնութագրիչները, քանի որ մենք գործ ունենք եբրայական գրական սեռի հետ, որը կոչվում է «մաշալ» («առակ»): Մաշալները համապատասխանում են մեր առած-ասացվածքներին, քանի որ բուն առակը (գրբ.՝ «առ ակն»՝ «աչքի առաջ») բարոյախոսական բնույթի այլաբանական գրական ստեղծագործություն է՝ բաղկացած

դիպաշարից և բարոյախոսությունից: Հետևաբար՝ ի սկզբանե առանձնանշենք, որ հայերեն բառի բացատրությունը հունական լեզվամտածողության շրջանակում է (հուն.՝ «պառօմիա»), և եբրայական գրվածքներում հանդիպող համապատասխան անվամբ հատվածները զուտ այդպես են անվանվում՝ ելնելով եբրայական բանասիրության ու իմաստասիրական մտածողության մեջ դրանց ընկալումից: Իսկ առած-ասացվածքները, որոնց համապատասխանում են եբրայական մաշալները, ժողովրդական բանահյուսության ամենատարածված տեսակներից են՝ կազմված այլաբանական բնույթի մեկ կամ երկու նախադասությունից, երբեմն՝ մի քանի բառերից, որոնց հատուկ են խոսքի պարզությունը, պատկերավորությունը, բնութագրումների դիպուկությունը:

Այսպես՝ «Ժողովող» գրքում առկա առակներն ու ասացվածքներն իրենց բովանդակությամբ տարբերվում են Սողոմոնին վերագրվող մյուս գործերից: Օրինակ՝ «Առակաց» գրքում առակները հուսադրող և մխիթարական են: Ըստ դրանց՝ նրանք, ովքեր հետամուտ են իմաստությանը, կհասնեն դրան և իմաստության հետ մարդու կյանքը կցնեն հարստությունն ու զորությունը և բոլոր տեսակի այլ օրինություններ: Գիրքը խրատում է, որ խրախուսությամբ ձեռք բերված հարստությունը չի հարատևի, բայց նա, ով զգույշ և արդարացիորեն հարստության հետևից է գնում, կհաջողի: Նրանք, ովքեր վախենում են Աստծուց և պահում են Նրա պատվիրանները, կյանք կգտնեն: Աշխարհում կա բարոյական կարգ, պատճառի և հետևանքի միջև կա ճանաչելի կապ: Աստված վերահսկում է ամեն ինչ, որ արդարության և իրավուն-

քի նժարը չշեղվի: Գրեթե յուրաքանչյուր էջում «Առակաց» գրքի իմաստությունները մոռանալ չեն տալիս, որ նրանք, ովքեր բարիք են գործում, հաջողության են հասնում և բարգավաճում, իսկ ովքեր չարիք են գործում, ձախողվում են: Աստվածաբանական օրինաչափ մտքերը բնորոշում են այս գրքի ուսմունքը: Բերենք «Առակաց» գրքից համապատասխան մեջբերումներ.

- Ողորմած մարդը բարիք է գործում իր հոգուն, իսկ անողորմը կործանում է իր մարմինը (11:17):
- Իմաստուն կամայք կառուցում են իրենց տները, իսկ անգամները՝ կործանում իրենց ձեռքերով (14:1):
- Չարի աչքերը ամեն ժամ սպասում են չարիքների, իսկ բարիները պիտի հանդարտվեն ամեն ժամ (15:15):

- Պատվիրաններ պահողը պահում է իր հոգին, իսկ նա, ով արհամարհում է իր ճանապարհը, պիտի կործանվի (19:16):

- Իմաստունը լավ է հզորից, և հանճարեղը՝ մեծամեծ դաստակերտներ ունեցողից (24:5):

- Լավ է համդիմանող մարդը, քան համառողը, քանզի եթե կրակը սրան շեշտակի հարվածի, բուժում չի լինի (29:1):

Ժողովողի առակներն ընթերցելով՝ տեսնում ենք, որ, ըստ հեղինակի, բարոյական կարգ չկա, և իմաստությունը ոչինչ է. «Ունայնություն ունայնությանց,— ասաց ժողովողը,— ունայնություն ունայնությանց. ամեն ինչ ունայն է» (1:2): Սողոմոնը հետամուտ էր իմաստությանը, բայց հասկացավ, որ այն «քամու հետապնդում» է, քանի որ «շատ իմաստության մեջ շատ գիտություն կա, և իր գիտությունն ավելացնողն իր ցավն է ավելացնում» (1:18): Իմաստունը կարող է տեսնել այնպիսի բաներ,

որոնք հիմարը չի կարող անգամ կանխատեսել, բայց երկուսն էլ դատապարտված են մահվան (2:14), և այդ հանգուցալուծման կենսադաշտում իմաստության ձգտումը դառնում է անիմաստ (2:15): Մահվանից հետո չեն հիշվում նաև ո՛չ իմաստունը, ո՛չ հիմարը (2:16): Մահվան իրականության առջև հավասարազոր են անգամ մարդն ու գազանը (3:19): Աշխարհում բացակայում է արդարությունը. ամօգ ճնշվածները թողնված են միայնակ ու անմխիթար:

Աշխարհը, որը Սողոմոնը նկարագրում է «Ժողովող» գրքում, կարծես կենսատարածք է՝ առանց Աստծո, առանց ակնհայտ արդարության, առանց կայունության: Աստված հիշատակվում է ամբողջ գրքում, բայց սա այնքան անհամատեղելի է թվում գրքի մնացած մասի ակնհայտ տարամիտվածության հետ, որ հետևյալ ձևակերպմամբ հնչում է որպես փիլիսոփայական ուղերձ և կյանքի ընկալման շարժառիթ. «Մարդուս համար ուտելուց, խմելուց և սեփական վաստակով ինքն իրեն հաճույք պատճառելուց ավելի լավ բան չկա» (2:24): Պարբերաբար հնչող այս և նման հորդորները տեղիք են տվել ո՞ւմանց՝ գիրքը բնորոշելու հեղինաստական (հեղոմիզմը կյանքի գերագույն նպատակ է սահմանում հաճույքը): Որոշ ուսումնասիրողներ գրքի գաղափարական ակունքները գտնում են էպիկուրիզմի հեթանոսական ձևակերպումներում կամ հեղոմիստական միհիլիզմի տեսության մեջ:

Իրականում, սակայն, չկա հակասություն ասացվածքների և գրքի մյուս հատվածների միջև: Առակները շատ ավելի բարդ են, քան մենք հաճախ գիտակցում ենք: Դրանցում չի ասվում, որ իմաստության և բարգավաճման, արդարության եւ հաջողության միջև

կա միակողմանի հարաբերություն: Դրանք չեն գրվել Հորի ճառախոս ընկերների կողմից: Ժողովողի գրքի խոհական մտքերը համատեքստային ընդգրկմամբ լիարժեք ըմբռնելու և բացատրելու համար անհրաժեշտ է անդրադառնալ որոշ բանալի բառերի իմաստային դաշտի լեզվաքննությանը:

Այսպես՝ եբրայերենում «ունայնություն» բառը (אֶחָד - հեվեյ) նշանակում է նաև «գոլորշի» (Առակ. 21: 6) կամ «շունչ» (Հոր. 7:16, Սաղմ. 39:5, 11, 62: 9, 62: 9, 94:11, 144:4, Ես. 57:13): Եբրայերեն բառը նշանակում է շնչառության ժամանակ անփութորեն արտաշնչվող գոլորշի, որն անտեսանելի է՝ բացառությամբ ձմռան ցուրտ օրերի, և ամեն դեպքում անմիջապես հոդս է ցնդում: Այն զաղափարը, թե այսաշխարհային կյանքը գոլորշի է, կարմիր թելի նման անցնում է Աստվածաշնչի ուսուցողական գրքերում.

Հարստությունը կարող է գոլորշի լինել, ինչպես ասում է «Առակաց»-ը. «Ով լեզվի ստությամբ գանձ է կուտակում, սնուտի բաների հետևից է գնում և մահվան որոգայթներին պիտի հասնի» (հմմտ. գրաբար՝ «Գանձ ստութեամբ լեզուի է՝ ունայնութիւն վայրապար. որ խնդրէն՝ խնդրեն զմահ») (21:6): Եթե անագնիվ կերպով հարստություն է գանձվում, դա թռիչքային գոլորշու պես է և ենթակա է անհետացման, իսկ գանձողն էլ՝ մահվան:

Կյանքի օրերը գոլորշի են. «Քամի որ հավիտյան չեն ապրի, թող որ ես համբերող միշտ լինեմ: Հեռու կաց ինձնից, քանի որ իզուր է կյանքը իմ» (հմմտ. գրաբար՝ «թափանց գոգի յանձնէ ինձ, եւ ի մարմնոյ զշունչ իմ, եւ ի մահուանէ զկեանս իմ» (Հոր. 7:16): Հորի գրքում ևս շեշտը դրվում է իրերի անկատարության վրա: ➔ *էջ 7*

Ողորմածությունը պետք է դառնա ընթացք

Երբ մեկը ձեռք է մեկնում աղքատին ողորմություն տալու համար, փրկում է իր անձը մահվանից և նմանվում է Աստծուն ու իր զանձերն է կուտակում երկնքում, որտեղ ո՛չ ցեցն ու ուտիճն են սպալկանում, և ո՛չ էլ զողերն են զողանում: Եվ ով ողորմում է աղքատին ու տնանկին, նրան չար օրվանից փրկում է Տերը և թույլ է տալիս, որ օրինյալ լինի նրա ողջ վաստակը: Չէ որ այսպես է ասում Քրիստոս. «Ողորմություն են կամենում և ոչ թե զոհ». դու ողորմությամբ ինձ պտուղ տվեցիր, և ես պիտի մաքրեմ քեզ քո մեղքերից: Քո ձեռքը մեկնեցիր երկրի վրա ապրող աղքատին ու այդպիսով մերձավոր դարձար Աստծուն, ողորմելով տնանկին՝ փոխ տվեցիր Աստծուն՝ երկնքում (Սուրբ Հովհան Ոսկեբերան):

Երեք կարևոր հանգամանք կա մարդու համար՝ մեղքերից մաքրվելու և հավիտենական կյանքին հասնելու համար: Առաջինն աղոթքն է, ապա՝ պահքն ու ողորմածությունը: Աստվածախոս Ավետարանում գրված է. «Երանի ողորմածներին, որովհետև նրանք պիտի ողորմություն գտնեն» (Մատթ. 5:7): Ողորմությունը դրախտից արտաքսված մարդուն բարձրացնում է մերձեցնելով հավիտենական կյանքին: Բայց միայն ողորմություն տալը բավական չէ. մարդը նյութական ունեցվածքի հետ նաև իր սիրտը, հոգին ու կամքը պետք է մատուցի, քանի որ ողորմությունն այնժամ է ընդունելի, երբ ի սրտե է բաշխվում: Աստծո համար ողորմությունն ընդունելի չէ, երբ ձեռքը տալիս է, իսկ սիրտը՝ ափսոսում. «Աստված սիրում է զվաթառատ տուրքը» (Բ Կորնթ. 9:7):

Գթությունը չափվում է գործողի իղձով ու կարողությամբ: Եթե մեկը հարուստ չէ՝ կարոտյալների տուրքը լիաձեռն մատուցելու, թող

այնքան տա, որքան կարող է: Տեր Հիսուս ասաց. «Ով այս փոքրիկներից մեկին միայն մի բաժակ սառը ջուր կտա խմելու՝ իբրև աշակերտ, ճշմարիտ են ասում ձեզ, իր վարձը չպիտի կորցնի» (Մատթ. 10:42): Մեկ ուրիշ անգամ էլ Տերը խրատում է երկրի վրա գանձեր չդիզել, այլ՝ «Վաճառեցեք ձեր ինչքերը և ողորմություն տվեք. ձեզ համար չինեցեք չինացող քսակներ և անհատնում գանձեր երկնքում, ուր ոչ գողն է մոտենում, և ոչ ցեցը՝ փչացնում. որովհետև ուր որ ձեր գանձն է, այնտեղ և ձեր սրտերը կլինեն» (Ղուկ. 12: 33–34):

Չարիքների ճանապարհին անզղջում մարդիկ թող չհուսան փրկության հասնել լուկ գթասրտությամբ ու տուրքերով, քանի որ ողորմության արդյունքի վրա հույս դնելով՝ առանց խղճի խայթի մեղանչելու կամ մեղքերից հետ չդառնալու դեպքում ողորմությունը կորցնում է իր նշանակությունն ու իմաստը: Այսպիսով՝ կարոտյալներին ողորմություն տալ, բայց երբեք

զանց չառնել կատարյալ զղջումն ու խոստովանությունը, աղոթքն ու պահեցողությունը, կամ հակառակը՝ քրիստոնեական չեն. «Բարի են աղոթքները՝ պահեցողություններով, ողորմություններով և արդարություններով» (Տոբիթ 12:8):

Տերը պատվիրում է. «Ողորմություն տվեք, և ահա ձեր ամեն ինչը մաքրել կլինի» (Ղուկ. 11:41): Բազում մեղավորներ աղքատներին ու Աստծո տան սպասավորներին տված ողորմությունների շնորհիվ արժանացան աստվածային գթասրտության ու շնորհների՝ մեղքերից մաքրվելով և արդարանալով: Շատերն էլ, ողորմություն բաշխելով, ազատվեցին տառապանքներից ու վշտերից, իսկ հիվանդներն էլ բժշկություն գտան: Անգամ մեռյալները կենդանություն են ստանում, ինչպես բարեպաշտ Տաբիթան Սուրբ Պետրոս առաքյալի ձեռքով մեռած վիճակից վերակենդանացավ այն այրիների աղաչանքով, որոնց ողորմություն էր արել (Գործք 9: 36–42): Նախքան Պետրոս առաքյալի ձեռքը մեկնելն ու կենդանացնելը, այրիները ողբում էին և ցույց տալիս, թե որքան հազուստներ և զգեստներ է իրենց համար կարել տվել Տաբիթան:

Մարդուն ողորմության են մղում սերը և կարեցանքը մերձավորի հանդեպ, քանի որ առանց սիրո և կարեկցանքի՝ որևէ մեկը չի կարողանա իսկական ողորմություն տալ: Ողորմած մարդն Աստծո

պատկերն է երկրի վրա, քանի որ Աստված բարեգութ է Իր արարչության հանդեպ: Տերն Իր անսահման մարդասիրությամբ ողորմեց և ներեց նույնիսկ չարագործներին, որոնք Իրեն խաչեցին:

Հոգևոր ողորմությունը ոչ պակաս է նյութական ողորմությունից: Պողոս առաքյալն ասում է. «Աստված մխիթարում է մեզ մեր բոլոր նեղություններից մեջ, որպեսզի մենք էլ կարող լինենք մխիթարելու նրանց, ովքեր ամեն տեսակ նեղություններից մեջ են, այն մխիթարությամբ, որով մենք ենք մխիթարվում Աստծուց» (Բ Կորնթ. 1:4): Արդ՝ եթե Աստված մխիթարում է մեզ, մենք ևս պարտավոր ենք մխիթարել միմյանց բոլոր նեղությունների ժամանակ, և «Աղքատին ողորմություն տվողը փոխ է տալիս Աստծուն, և ըստ նրա տվածի էլ՝ Աստված պիտի հատուցի նրան» (Առակ. 19:17):

Սուրբ Գրքում շատ են ողորմության դրվագները, որոնք դարձել են բոլոր ժամանակների համար ընդօրինակելի: Այս առումով դասական է, օրինակ, մեծահարուստ Չաքեոս մաքսավորի՝ աղքատներին օգնելու հանձնառությունը: Երբ Հիսուս երիցվում շրջում էր, Չաքեոսը ցանկանում է Նրան տեսնել, սակայն բազմության պատճառով չի կարողանում: Եվ քանի որ կարճահասակ էր, բարձրանում է ժամտաթզնու վրա, «որպեսզի տեսնի Նրան, որովհետև Նա հենց այդտեղով էր անցնելու» (Ղուկ. 19:4):

Հիսուս, տեսնելով Չաքեոսին, կանչում է նրան և ասում, որ այդ օրը պետք է գիշերի նրա տանը: Չաքեոսն ուրախությամբ ընդունում է Տիրոջը և ասում. «Տեր, ահա իմ ինչքերի կեսը կտամ աղքատներին, և եթե որևէ մեկին զրկել եմ, քառապատիկ կհատուցեմ» (Ղուկ. 19:8): Չաքեոսի խոսքերն արժանանում են Տիրոջ գնահատանքին. «Այսօր այս տան համար փրկություն եղավ» (Ղուկ. 19:9):

Որքան էլ կարևորվում են ողորմած լինելն ու կարեկցանքը, սակայն Ավետարանն ուսուցանում է, որ այդ ամենը պետք է կատարվի զաղոտմաբար. «Չգույշ եղեք, որ ձեր ողորմությունը մարդկանց առջև չանցեք, որպես թե այն լինելի ցույց նրանց. այլապես վարձ չեք ընդունի ձեր Հորից, որ երկնքում է» (Մատթ. 6:1): Սա է ճշմարիտ ողորմության կերպը, այս է քրիստոնյային վայել վարքը. «Այլ երբ ողորմություն անես, փող մի հնչեցրու քո առջև, ինչպես անում են կեղծավորները ժողովարաններում և հրապարակներում, որպեսզի փառավորվեն մարդկանցից: Ե՛շմարիտ են ասում, այդ իսկ է նրանց վարձը: Այլ երբ դու ողորմություն անես, թող քո ձախ ձեռքը չհիմանա, թե ինչ է անում քո աջը, որպեսզի քո ողորմությունը ծածուկ լինի, և քո Հայրը, որ տեսնում է, ինչ որ ծածուկ է, կհատուցի քեզ հայտնապես» (Մատթ. 6:2–4):

Դպրական զգեստներ և ծիսական պարագաներ

«Ցնծասցէ անձն իմ ի Տէր, զի զգեցոյց ինձ հանդերձ փրկութեան եւ պատմունձան ուրախութեան, իբրև փեսայի եղ ինձ պսակ, եւ որպէս զհարսն զարդարեաց զիս, շնորհօք Տեառն մերոյ Յիսուսի Քրիստոսի, Որում վայելէ փառք, իշխանութիւն եւ պատիւ. այժմ եւ միշտ եւ յաւիտեանս յաւիտենից. ամէն»
(Պատարագէի զգեստավորման աղոթք, խորհրդատետր):

Եկեղեցում կամ այլ վայրերում ծիսական արարողակարգերի ժամանակ յուրաքանչյուր քրիստոնյա կարող է տեսնել հոգևորականների, որոնք զգեստավորված են ծիսական գունավոր հանդերձանքով և օգտագործում են տարբեր պարագաներ: Արժե ճանաչել և իմանալ, թե յուրաքանչյուր ծիսական զգեստ և իր էրբ է կիրառվում, ինչն է կիրառվում, ինչ խորհուրդ ունի, և ով իրավունք ունի այն կրել, օգտագործել:

Կրոնական պաշտամունքի ժամանակ զգեստների և ծիսական պարագաների գործածությունը դեռևս զալիս է հինկուտակարանյան ժամանակաշրջանից, երբ Աստված Մովսէսին պատվիրեց Ահարոնի համար զգեստներ պատրաստել. «Դու Իսրայելի որդիներից քեզ մոտ կբերես քո եղբայր Ահարոնին, նրա հետ նաև նրա որդիներին՝ Նաբադին ու Աբիուդին, եղիազարին ու Իթամարին, որպեսզի ինձ համար քահանայություն անեն: Ի պատիվ և ի փառս քո եղբայր Ահարոնի՝ սրբազան զգեստներ կպատրաստես: Դու կխոսես մտքով իմաստուն բոլոր մարդկանց հետ, որոնց ես իմաստության ոգով եմ լցրել, որ նրանք Ահարոնին սրբազան զգեստներ պատրաստեն սրբության համար, որոնցով էլ նա քահանայության պաշտոն է կատարելու ինձ համար: Արանք են այն զգեստները, որ նրանք պիտի պատրաստեն. մինչև ոտքի թաթերը հասնող երկարավուն զգեստ, ուսի ու լանջի վակասներ, բեհեզե պատմունձան, խույր և գոտի: Սրբազան զգեստներ թող պատրաստեն քո եղբայր Ահարոնի ու նրա որդիների համար, որպեսզի ինձ համար քահանայություն անեն» (Ելք 28.1–4):

Հայ եկեղեցականի զգեստներն ու ծիսական պարագաները ժամանակի ընթացքում ենթարկվել են տարբեր փոփոխությունների և դարերի խորքից հասել մեզ այնպիսին, ինչպիսին որ տեսնում ենք զանազան եկեղեցապաշտական արարողությունների ժամանակ:

Մինչ անդրադառնալով դպրաց դասի հանդերձանքի և ծիսական պարագաների կիրառությանը ու նշանակությանը, նախ հասկանանք, թե ինչպես է դասակարգված մեր եկեղեցու նվիրապետական համակարգը:

«Նվիրապետություն» (իտալերեն՝ gerarchia, հունարեն՝ τελεαρχια) նշանակում է «սրբազանագործ եկեղեցականների դասակարգ, հոգևորականություն» (Հայերեն բացատրական բառարան, հտ. Գ), «եկեղեցական դասակարգ (իր ամենախոնարհ աստիճանադրերն մինչև բարձրագույնը ընդգրկող կարգ). հոգևորականութիւն. 2. որևէ դասաւորում (ստորադասէն մինչև բարձրաստիճան). կարգապետութիւն» (Հայոց լեզուի մոբ բառարան): Եկեղեցական նվիրապետության մեջ մտնում են բոլոր աստիճանները, որոնք տրվում են ձեռնադրությամբ և տվչությամբ: «Նվիրապետություն» բառի հիմքում ընկած է «նվեր» արմատը, որ եկեղեցական իմաստով նշանակում է պատարագ, զոհ, ընծա: Նվիրապետական յուրաքանչյուր աստիճան ունեցող անձին տրվում են առանձին իշխանություն ու կոչում, և իր ստացած աստիճանի իրավասության սահմաններում նա կարող է պաշտոնավարել, ծառայել, նվիրագործել, աղոթել, պատարագել: Իսկ «նվիրապետ» բառը հայերենում նշանակում է «բարձրագույն հոգևորական. քահանայապետ, կաթողիկոս»:

Հայոց եկեղեցու նվիրապետական իննդասյա համակարգը, ձևավորվելով և արմատավորվելով Ս. Թադեոս առաքյալի հիմնած աթոռից, իր ուրույն տեղն է գրավում Ընդհանրական եկեղեցում: Հայ եկեղեցում նվիրապետական կարգի գլուխն է Ամենայն Հայոց Կաթողիկոսը: Այսօր մեր եկեղեցու նվիրապետական կառույցը դասակարգված է հետևյալ կերպ.

1. Դռնապանություն,
2. Ընթերցողություն,
3. Երդմնեցուցություն,
4. Ջահընկալություն,
5. Կիսասարկավագություն,
6. Սարկավագություն,
7. Քահանայություն,
8. Եպիսկոպոսություն,
9. Կաթողիկոսություն:

Բացի վերոհիշյալ նվիրապետական աստիճաններից՝ մեր եկեղեցում կան այլ կարգեր և տվչություններ, որոնց ընթացքում հոգևորականներին տրվում են որոշակի պաշտոններ, կարգեր և աստիճաններ: Այդպիսի ծիսական



արարողակարգերից են վարդապետական և ծայրագույն վարդապետական տվչությունը, ուրարի տվչությունը, Ամենայն Հայոց Կաթողիկոսի օրհնությամբ քահանաներին ավագության, լանջախաչ կրելու, եպիսկոպոսներին՝ արքունի տիտղոսների տվչությունը և այլն:

Ինչպես մշեցիմբ, Հայ եկեղեցու առաջին չորս աստիճաններն են դռնապանությունը, ընթերցողությունը, երդմնեցուցությունը և ջահընկալությունը: Այս բոլոր աստիճաններն ունեցող անձը կոչվում է դպիր: Ձեռնադրության Մաշտոց ծիսամատյաններում կա ցուցում, ըստ որի՝ դպրաց դասի մեջ է ներառված նաև կիսասարկավագության աստիճանը. «Հիմնգերորդ կարգ կիսասարկավագին, որ է դպիրն»: Նախ հասկանանք, թե դպրաց դասի մեջ մտնող վերոհիշյալ 4 աստիճաններից յուրաքանչյուրն ինչ պարտականություններ է իրավունքներ ունի:

Ըստ Մաշտոց ծիսարանի՝ մինչև դպրական աստիճանի տվչությունն անձը նախ սաղմոսերգուի և ավելածուի պաշտոնները պետք է ստանա: Սաղմոսերգուին իրավունք է տրվում սաղմոսներ ընթերցելու եկեղեցական արարողությունների ժամանակ: Անձն իր առաջին քայլն է անում հոգևոր ասպարեզում: Արարողությունը կատարող եպիսկոպոսը խաչաձև կտրում է ընծայացուի մագից մի հատված, որով նվիրյալը մուտք է գործում հոգևոր կյանք՝ հրաժարվելով երկրավոր աշխարհի ցանկություններից: Մյուս պաշտոնն ավելածուն է, որը պետք է հետևի և մասնակցի եկեղեցու մաքրությանը: Այս պաշտոններն ունեցող անձինք եկեղեցու խոնարհագույն ծառայողներն են և նրանց այլ կերպ անվանում են կղերիկոսներ:

Դպրության առաջին աստիճանը դռնապանությունն է: Այս աստիճանն ունեցող անձն իրավունք է ստանում բացելու և փակելու եկեղեցու դուռը: Այս կարգը, համաձայն Մաշտոց ծիսարանի, պետք է կատարվի եկեղեցուց դուրս:

Հաջորդ աստիճանն ընթերցողությունն է. այն, ըստ Մաշտոցի, տրվում է եկեղեցու ներսում (սկզբնամասում): Ընթերցողին իրավունք է տրվում եկեղեցական արարողությունների ժամանակ կարդալ Աստվածաշունչ. «Ա՜ն զգիրս զայս և լին աստուածային բանին պատմօղ և տեղեկացիր մոցին: Եթե ուղիղ մտօք և հոգւով զգործս քո պաշտես, կալցես բաժին ընդ ժողովս սրբոց և սիրողացն Աստուծոյ. և դու եղբայր՝ որ լինիս ընթերցող ի տան Աստուծոյ՝ զգործս քո զուշութեամբ կատարես» (Ձեռնադրության Մաշտոց):

Դպրության երրորդ աստիճանը երդմնեցուցությունն է, որը, համաձայն Մաշտոց ծիսարանի, տրվում է եկեղեցու կենտրոնական մասում: Երդմնեցուցիչն իրավունք է ստանում հալածել դևերին. «....զի զօրասցի բարբառով բերանոյ հալածել զպիղծ ոգիսն և զաղտեղիս...»: Եպիսկոպոսը Մաշտոց ծիսական գիրքն է տալիս նվիրյալին՝ ասելով. «Ընկալ և ամփոփես զգրեալս աստ ի միտս քո. քանզի տամ քեզ հրաման դնել զձեռն քո ի վերայ հիւանդաց, և որք զա ի մկրտութիւն՝ հրաժարեցուցանել...» (Ձեռնադրության Մաշտոց): Այսինքն՝ երդմնեցուցիչն իրավունք է տրվում ձեռքը դնելու հիվանդների վրա և աղոթելու նրանց համար, ինչպես նաև մկրտության ժամանակ մկրտության եկողներին «հրաժարեցնել սատանայից և ամեն չար զորություններից»։ «Գործք առաքելոց»-ում կա հիշատակություն երդվեցնողների մասին. «Շրջիկ հրեաներից ոմանք, որ երդուցնողներ էին, լանդգնեցին Տէր Յիսուսի անունը կանչել չար ոգիներ ունեցողների վրա՝ ասելով. «Երդուցնում եմ ձեզ Յիսուսով, որին քարոզում է Պօղոսը» (Գործք 19.13):

Դպրության չորրորդ աստիճանը ջահընկալությունն է: Ջահընկալի պարտականությունն է վառել եկեղեցու մոմերը, կանթեղները, Պատարագի համար պատրաստել նշխարն ու գինին: Եպիսկոպոսը վառված աշտանակը տալիս է նվիրյալին՝ ասելով. «Ընկալ զաշտանակ լապտերիս, և ունիս իշխանութիւն լուցանել զջահս և զկանթեղս ի սուրբ եկեղեցիս», ապա բաժակամանն է տալիս՝ ասելով. «Ա՜ն զբաժակամանս զայս՝ լնուլ ի սա զգինի ի սպաս խորհրդոյն»։ ➡ էջ 8

Կյանքի խոհափիլիսոփայությունը «Ժողովող» գրքում

➡ էջ 6

Կյանքը ոչ այլ ինչ է, քան շնչառություն՝ լինի դա արագ կամ թույլ. մարդը կենդանի է, որքանով որ շնչում է օդը:

Դավիթ սաղմոսերգուն ասում է, որ մարդը գոլորշի է, նրա գոյությունն ընդունայն է, վաղորդայնի անհետացող մառախուղի պես. «Ահա սահման դրի իմ օրերին, // Եվ կարողության ուժը ոչինչ է իմ առջև, // Որով բոլորովին ունայն է ամեն մսեղեն մարդ» (38:6), «Կշտամբելով մեղքերի համար՝ խրատեցիր մարդուն, // Սարդոստայնի պես մաշեցիր նրա անձը, // Սակայն ունայն է ամեն մարդ» (38:12), «Սակայն ընդունայն են որդիք մարդկան, սուտ են որդիք մարդկան, ի կշիռս իրեանց մեղանչեն, եւ ինքեանք յունայնութեան են ի միասին» (62:10), «Տէր, ով է մարդը, որ հայտնվեցիր նրան, // Կամ մարդու որդին, որ հաշվի ես առնում նրան: // Մարդը նմանվեց ունայնության, // Եվ նրա օրերը ստվերի պես են անցնում» (143:3–4):

Մարդկային կարգազանց իրականության մեջ միայն Տիրոջն ապավինելու դեպքում է փրկությունը երաշխավորվում, մարդկային ջանքերը չնչին են ու անարժեք. «....

քեզ չեն փրկելու քո մեղությունից. դրանց բոլորին հողմերը պիտի տանեն, և մորիկները բաժան-բաժան պիտի անեն: Իսկ նրանք, ովքեր ինձ վրա են հույս դրել, պիտի ստանան երկիրը և ժառանգեն իմ սուրբ լեռը» (հմմտ. զրաբար՝ «....ոչ ապրեցուցեն զքեզ ի մեղութենէ քունմէ. զի զամենեսեան զնոսա հողմք առցեն (երբ. բարձեց ունայնութիւն), եւ մորիկք բաժանեացեն. իսկ որ յիմ յուսացեալ եմ՝ ստասցին զերկիր, եւ ժառանգեացեն զեառն սրբութեան իմոյ») (Ես. 57:13):

Սողոմոնն ուսումնասիրում է աշխարհի «գոլորշի» բնավորությունը մի քանի ոլորտներում: Արարչի կողմից ստեղծվում է եղենակյան մաքրաջինջ պարտեզը (ժող. 2:1–11, հմմտ. Ծննդ. 2:8–25): Սողոմոնը, ամփոփելով Տիրոջ գործունեությունը, ստեղծվածք ևս համարում է ունայն՝ «գոլորշի». «Աչք մետեցի իմ ձեռքերի կատարած բոլոր գործերին և դրանք անելու համար իմ կրած հոգնություններին, և ահա ամեն ինչ ունայնություն է, քամուն բռնելու մման, և ոչ մի օգուտ չկա արեգակի մերքո» (2:11): Նա իմաստությանն է հետամուտ, բայց քանի որ իմաստուններին ու հիմարներին մոյմ վախճանն է սպասում, համարում է իմաստունն առա-

վելություն չունի (2:12–17): Նա փորձում է զարգացնել իր հմտությունները և իմաստություն ձեռք բերել, բայց գիտակցում է, որ ինքը վերահսկողություն չունի իր աշխատանքի վերջնարդյունքի վրա, քանի որ հիմարը կարող է այն ժառանգել և փչացնել ու խեղաթյուրել (2:18–23): Ի վերջո, կյանքը ցավ ու տառապանք է. «Նրա բոլոր օրերը ցավերով են լի և զբաղումները՝ տրտմությամբ, և մույմիսկ գիշերը նրա սիրտը չի մնջում: Սակայն սա ևս ունայնություն է» (2:23):

Երբ Սողոմոնն ասում է՝ ամեն ինչ «գոլորշի» է, նա չի ասում, որ ամեն ինչ անիմաստ է կամ անմտորեն հղացված. նա ասում է, որ ամեն ինչ ժամանակավոր է. այն գոլորշիանում է, անհայտանում: Ժամանակի ընթացքում մարդկային բոլոր ունակությունները և նվաճումները կորցնում են իրենց իմաստը, ենթարկվում ժամանակի քայքայմանը: Մարդկային բոլոր մտքերը թռիչքային են. կյանքը սեղո ու կարճ է: Մահն այն հիմնական միջոցն է, որը կյանքը գոլորշի է դարձնում: Այն, ինչ իմաստությունը դարձնում է «քամու հետապնդում», այն փաստն է, որ մահանում են և՛ հիմարները, և՛ իմաստունները: Իմաստությունը

ասպրողն առավելություն ունի, բայց իմաստությունը չի օգնում որևէ մեկին խուսափել այս վերջնական ավարտից:

Ժամանակի ընթացքում «ունայնություն» բառը ձեռք բերեց մոր իմաստ ևս. սեփական կարողությունների կամ գրավչության նկատմամբ չափից դուրս հավատ համեմատած ուրիշների հետ: Մինչև 14-րդ դարն այն չունեի նման եսապաշտական ենթատեքստ և պարզապես նշանակում էր անիմաստություն: Բազմաթիվ կրոններում ունայնությունը, իր ժամանակակից իմաստով, համարվում է ինքնակառապաշտության ձև, որտեղ մարդն իրեն նմանեցնում է Աստծուն՝ ընդգծելով սեփական կերպարը և դրանով իսկ ժամանակի ընթացքում կորցնելով աստվածային նմանությունը:

Փիլիսոփայության մեջ ունայնությունը ներկայացվում է որպես եսակենտրոնության և հպարտության ավելի լայն դրսևորում: Ֆրիդրիխ Նիցշեն գրել է, որ «ունայնությունը ինքնատիպ երևալովախն է. հետևաբար՝ դա հպարտության պակաս է, բայց ոչ ինքնատիպության բացակայություն»:

Արևմտյան արվեստում ունայնությունը հաճախ խորհրդանշա-

շական կերպով պատկերվում էր սիրամարգի տեսքով, իսկ աստվածաշնչյան բնագրում՝ Բաբելոնի պողոնիկ կերպարով: Վերանվաճող ժամանակ ունայնությունը ներկայացվում էր որպես մերկ կին՝ երբեմն մստած կամ պառկած բազմոցի վրա՝ մագերը սանրով և հայելիով խնամելիս: Ունայնության խորհրդանիշերը ներառում են զարդեր, ոսկե մետաղադրամներ, քսակը և մահվան պատկերը: Ունայնության որոշ պատկերներ ներառում են մագաթներ, որոնց վրա գրված է Omnia Vanitas («Ամեն ինչ ունայնություն է»), որը լատիներեն Աստվածաշնչի ժողովրդի գրքից հայտնի մեջբերումն է:

Այսպիսով՝ վեր հանելով «Ժողովող» գրքում բովանդակային հիմնական հղացքները՝ պարզ դարձավ, որ առակավոր խոսքում և առած-ասացվածքների մեջ գրքի ինքնօրինակ իմաստությունը դրսևորվում է սողոմոնյան մյուս գրքերից տարբերվող իմաստութեական շեշտադրումներով և աստվածաբանական անգույնական լեզվամտածողությամբ:

ՕՖԵԼՅԱ ՂԱՍՊՐԱՆՅԱՆ
Նարեկ սրկ. ՂԱՍՊՐԱՆՅԱՆ

Եվան և Սառան՝ հավատքի նախամայրեր. մարդու անկումը և Աստծո փրկագործությունը

Նին Կտակարանի առաջին գիրքը՝ Ծննդոցը, մի կողմից աշխարհի արարման հիասքանչ պատմությունն է, մյուս կողմից՝ մարդկային կյանքի ու բարոյական սխալների խորունկ խորհրդածությունը։ Գիրքն ուսումնասիրելիս հաճախ մոռացության է մատնվում մի կարևոր շերտ՝ կանանց ներկայությունը, որոնք ուրույն դերակատարություն ունեն մարդկության պատմության մեջ։ Նրանք միայն մարդեր կամ կողակիցներ չեն, այլև հավատքի կենսարար հենասյուներ՝ երբեմն լռելյայն, բայց անսասան հավատքով։

Աստվածաշունչը մեզ է փոխանցում մի շարք կանանց կյանքի պատմություններ, որոնց կերպարներում միախառնված են հավատքի ուժը, մարդկային անկատարությունը և աստվածային ներումը։ Այդ կանանցից են Եվան և Սառան. նրանք ոչ միայն կենսաբանական նախամայրեր են, այլև հոգևոր նախատիպեր՝ մարդկության վաղ շրջանի և Աստծո խոստման իրականացման պատմության մեջ։ Եվան՝ որպես նախամայր, ներկայացնում է մարդու ազատ կամքը, իսկ Սառան մարմնավորում է հավատքի կայուն ընթացքը և Աստծու կողմից տրված խոստումին հավատարմությունը։ Նրանց կերպարների ուսումնասիրությունը բացահայտում է մարդկային բնության բարդությունները և աստվածային ծրագրի ներքին տրամաբանությունը։

Ծննդոց գրքում հիշատակվող առաջին կինը՝ Եվան, Աստծո պատկերով ստեղծված մարդու երկրորդ կեսն է։ Եվայի կերպարը ձևավորվում է աշխարհի արարման սկզբում. «Տեր Աստված ասաց. լավ չէ, որ մարդը միայնակ լինի։ Նրա մնամությամբ մի օգնական ստեղծեմք նրա համար» (Ծննդ. 2.18)։ Եվան ոչ միայն Ադամի լրացումն է, այլև Աստծո ստեղծագործական մտադրության մի անբաժանելի մասնիկը։ Մարդկության առաջին կինը՝ Եվան, բազմիցս ներկայացվել է որպես մեղքի, անկման ու մահվան պատճառ։ Սակայն այս մեկնաբանությունն աստվածաշնչյան իրականության միայն մի կողմն է։ Ծննդոց գրքի խորքային ընթերցումը բացահայտում է Եվայի կերպարը՝ որպես անբաժանելի սկզբնավորող և էթիկական ընտրության խորհրդանիշ։ Եվան ստեղծվում է նույն աստվածային պատկերով, ինչ Ադամը (Ծննդ. 1.27), և նրանց առաքելությունը մեկն էր. երկուսն էլ կոչված էին մշակելու և պահելու դրախտը։ Սակայն ընտրությունը՝ «բարու և չարի գիտության ծառից չուտելու» պատվիրանագրացությունը, բացում է նոր էջ մարդու ինքնագիտակցության մեջ։

Եվայի ընտրությունը՝ Աստծո պատվիրանը խախտելը, հաճախ դիտվում է իբրև թուլության և առաջին իսկ պահին զայթակղության հետևանք, սակայն կարելի է ասել, որ այս արարքն առաջին անգամ դրսևորում է մարդու ազատ կամքը, որին Աստված չի միջամտում։ Ի տարբերություն հրեշտակների՝ մարդն ստանում է ընտրության իրավունք՝ հետևել կամ չհետևել Տիրոջ խոսքին։ Եվան այս ընտրությամբ դառնում է առաջին փոր-

ձառու մարդը, որ գիտակցում է մեղքի ծանրությունը, ցավը, սակայն նաև ապաշխարության և նոր կյանքի ճանապարհը։

Աստվածաշնչյան պատմության մեջ Եվան չի լքում սրբազան հարթակը։ Նա դառնում է ողջ մարդկության նախամայր (Ծննդ. 3.20)՝ կրելով իր մեջ թե՛ անկման ու մահվան և թե՛ կյանքի շարունակականության խորհուրդը։ Մեզ համար Եվան խորհրդանշում է ազատ ընտրության ողբերգական, բայց նաև արժանապատիվ հնարավորությունը։ Նա մեզ հիշեցնում է, որ նույնիսկ սխալ ընտրությունից հետո աստվածային ներման և փրկության ճանապարհը բաց է։


Եթե Հին Ուխտում Եվան հանդես է գալիս որպես անկման նախապատմություն, ապա Նոր Ուխտում նրա կերպարը վերափոխվում է դառնալով մարդկային խոցելիության, հավատքի լարումների ու վերականգնման կարիքի փոխաբերություն։ Պողոս առաքյալն իր ուղերձներում Եվայի մասին հիշատակում է որպես խաբեության զոհի, բայց ոչ որպես մեղքի գլխավոր պատասխանատուի։ Այդ առումով Նոր Կտակարանի աստվածաբանությունը միտված է մեղքը վերագրելու Ադամին՝ իբրև մարդկության գլխի, մինչ Եվան ներկայացվում է իբրև հոգևոր զգուշության նախատիպ, որի կերպարը վերստին հիշեցնում է մարդկային ազատ կամքի վտանգը։

Բ Կորնթացիս 11.3-ում Եվայի խաբված լինելը դառնում է օրինակ եկեղեցու համար, որ անհնազանդությունը ծնվում է մաքուր ու պարզ հավատքի աղավաղումից։ Եվան խորհրդանշում է ոչ թե կնոջ մեղսակի լինելը բնոյթով, այլ հավատքի փխրունությունը՝ առանց Աստծու խոսքի գիտակից պահպանման։

1 Տիմոթեոս 2.13–15 հատվածը, չնայած իր պատմական բարդությանը, մատնանշում է Եվայի կերպարը արարածական կարգի և փրկության ներգործության միջև՝ եզրահանգելով, որ կինը կարող է փրկվել, եթե մանուկներ ծնելով՝ ապրի հավատքով ու սրբությամբ։ Այստեղ ծնունդը կարելի է մեկնաբանել մարիամական իմաստով. ինչպես Մարիամը՝ նոր Եվան, կյանք տվեց Քրիստոսին, այնպես է յուրաքանչյուրը կարող է հավատքի միջոցով կյանք հաղորդել իր շրջապատին։

Այսպիսով՝ Նոր Կտակարանում Եվայի կերպարը դառնում է նախապատմություն այն կանանց համար, որոնք ապրում են ճշմարտության մեջ, հաղթանակում գայթակղությունը խոհեմությամբ ու հավատքով։ Եվայի դերը չի սահմանափակվում մեղք գործելով. նա նաև մայր է դառնում, երեք որդի ունենում (Կայեմին, Աբել, Սեթ)՝ շարունակելով կյանքի շղթան։ Նրա կյանքի պատմությունը միաժամանակ ցավոտ և հուսադրող ուղերձ է. մարդու անկումի պայմաններում էլ Աստված շարունակում է իր փրկագործ ծրագիրը։

Ծննդոց գրքում առանձնացող հաջորդ կինը Սառան է՝ Աբրահամի կողակիցն ու համայն հրեաների նախամայրը։ Սառան,



Յուլիուս Շնոր ֆոն Կարուսֆելդ. Ադամը և Եվան, 1860 թ.

ի տարբերություն Եվայի, Աստծո ծրագրում հայտնվում է հավատքի պատմության որոշիչ փուլում։ Աստված կանչում է Աբրահամին՝ դառնալու մեծ ազգի հայր, և Սառան դառնում է այդ խոստման անմիջական կրողը։ Հատկանշական է, որ աստվածային հայտնությունն ուղղվում է ոչ միայն Աբրահամին, այլև Սառային. «Ես կօրհնեմ նրան և նրա միջոցով քեզ զավակ կպարգևեն» (Ծննդ. 17.16)։

Ծննդոց գրքում Սառան ներկայանում է որպես մի կին, որի կյանքը հյուսված է սպասման, հուսահատության, կասկածի և վերջապես իրագործված հավատի պատմությունից։ Նրա կյանքը մի յուրօրինակ հոգևոր ճանապարհ է, որտեղ մարդկային տկարությունն աստիճանաբար փոխակերպվում է հավատքի ամրության։ Աստծո խոստումը՝ Սառային որդի պարգևելու մասին, ի սկզբանե թվում է անհավատալի։ Սառան ծեր է, տարիներ շարունակ ամուլ, իսկ խոստումը՝ հեզմական։ Նա անգամ ծիծաղում է լսելով, որ մի օր մայր է դառնալու (Ծննդ. 18.12)։ Սակայն այդ ծիծաղը զուտ կասկած չէ. այն արտահայտում է մարդու սրտի խորքում բորբոքվող հույզերը՝ միախառնված ակնկալիքի, ցավի ու թաքուն ցանկության հետ։ Աստված, ի պատասխան, վերածում է այդ ծիծաղը ուրախության. Իսահակ անունը՝ «ծիծաղ», դառնում է հավերժ հիշատակում Սառայի հավատքի հաղթանակի։

Սառան միակն է կանանցից, որի մահը և թաղման վայրը՝ Մակփեյլայի քարանձավը, հատուկ ընդգծված են Սուրբ Գրքում (Ծննդ. 23.19)։ Դա պատահական չէ։ Նրա կյանքը վկայություն է այն ճշմարտության, որ Աստվածաշնչյուն կնոջ դերը միայն տղամարդու առաքելությանն աջակցել չէ, այլև նրա ուրույն հավատքը և ուղիղ հարաբերությունը։ Սառայի կերպարը մեզ սովորեցնում է համբերություն՝ հոգևոր խոստումների կատարման ճանապարհին։ Նա մեր հոգևոր նախամայրն է, որի կերպարում տեսնում ենք ոչ թե կատարյալ հավատացյալի,

այլ մի կնոջ, որը կասկածում է, հարցնում է, բայց չի դադարում մնալ խոստման շրջանակում։ Իսկ հավատքը, ինչպես ասում է Պողոս առաքյալը, «հուսացած բաների հաստատումն» է (Եբր. 11.1), և Սառան այդ վստահության կենդանի խորհրդանիշն է։

Եվան և Սառան՝ երկու նախամայր, կանգնած են մարդկության փրկագործ պատմության տարբեր առանցքներում։ Եվան ցույց է տալիս, թե ինչպես կարող է մարդու ընտրությունը խախտել ներդաշնակությունը, բայց միաժամանակ դառնալ աստվածային գթության դռնբաց։ Սառան՝

հակառակ բոլոր բնական հնարավորություններին, դառնում է հավատքի նախօրինակ. նրա միջոցով աշխարհ է գալիս խոստումնաբաշխ ժառանգությունը։

Եվան խորհրդանշում է, որ մեղքն ունի ճակատագրական հետևանքներ, իսկ Սառան հիշեցնում է, որ հավատքը պարզևատրվում է, նույնիսկ երբ այն լիարժեք չէ։ Այս կերպարները որքան էլ հակադիր թվան, միավորվում են մեկ ճշմարտության շուրջ. Աստծո ծրագիրն իրագործվում է նույնիսկ մարդկային անկատարության պայմաններում։ Այդպես նրանք երկուսն էլ դառնում են նախամայրեր՝ ոչ միայն ըստ մարմնի, այլև ըստ հոգու։

Սառայի կերպարում միաժամանակ դրսևորվում են մարդկային թուլությունը և աստվածային հավատարմությանն արձագանքելու կարողությունը։ Նրա ծիծաղը՝ ի պատասխան հրեշտակի խոստմանը («Եվ Սառան ծիծաղեց իր ներսում», Ծննդ. 18.12), արտահայտում է մարդկային թերահավատությունը, անհնարինը հնարավոր համարելու տարակուսանքը։ Բայց այդ նույն Սառան հետագայում հիշվում է որպես հավատքի օրինակ. «Հավատով ինքը Սառան էլ, որ ամուլ էր, որդեծնության սերմն ստանալու զորությունն ունեցավ և ծնեց առաջացած տարիքում, քանի որ հավատարիմ համարեց նրան, ով խոստացավ այդ բանը» (Եբր. 11.11)։

Սառայի պատմությունը նաև ընտանեկան բարդությունների պատմություն է։ Ազարի՝ աղախնու միջոցով ժառանգ ունենալու նրա որոշումը (Ծննդ. 16.2) ցույց է տալիս, թե ինչպես կարող է մարդը օգնել Աստծուն՝ հաճախ հարույցելով ցավոտ հետևանքներ։ Սակայն Աստված մնում է հավատարիմ իր խոստմանը. Իսահակը ծնվում է, և Սառան ասում է. «Աստված ուրախություն պարգևեց ինձ, և ով որ լսի այդ մասին, ինձ հետ կուրախանա» (Ծննդ. 21.6)։

Մեկնե Գրիգորյան

Դպրական զգեստներ և ծխական պարագաներ

← էջ 7

Ամփոփելով՝ պետք է արձանագրել, որ դպիրն իրավունք ունի ստորև ներկայացվող ծխական պարագաներից օգտվել և իր սպասավորությունը բերել եկեղեցուն հետևյալ կերպ՝

- եկեղեցին մաքրել, սաղմոս կարդալ ժամերգությունների ժամանակ (*ժամագրքով*),
- եկեղեցու դուռը փակել և բանալ բանալիով,
- սուրբգրային ընթերցումներ կարդալ *Աստվածաշնչից* կամ *Ճաշոցից*, «իրաժարեցնել» մկրտության եկած անձանց (*Մաշտոց ծիսամատյանի* կիրառմամբ), թժշկության աղոթք կարդալ՝ ձեռքը դնելով հիվանդի վրա,
- եկեղեցու մոմերը, կանթեղները

վառել, *նշխար* գործել և Պատարագի *գինին* պատրաստել։

Դպրական աստիճանի և վերջինիս հետ կապված հարակից ծխական պարագաների ներկայացումից հետո տեսնենք, թե ինչպիսի հանդերձանք ունեն դպիրները։ Դպրական զգեստը կոչվում է շապիկ։ Այն հասնում է ուսից մինչև գարշապար. վզից ներքև ուղիղ իջնող և մարմինը ամեն կողմից ծածկող, ամենաներքին եկեղեցական հագուստն է։ Ըստ Մաղաքիա արք. Օրմանյանի՝ շապիկն առաջ վերևից ներքև հավանաբար բացված է եղել. երկու կողմերն իրար վրա են բերել և ծածկել։ Օրմանյանը նշում է, որ շապիկի նյութը ճերմակ կտավից կամ սպիտակ բեհեզից է կարված եղել, սակայն այսօր այն

տարբեր գույներով և նախշերով է կարված։ Եկեղեցական շապիկի եպան մաս է կազմում նաև ուսանոցը կամ թիկնոցը։ Այն կարող են կրել դպրական շապիկի վրայից, «որ կը ծածկե ուսերն ու թիկունքին վերի մասը եւ կործեքին վրայէն կիջնէ գօտին» (Մաղաքիա արք. Օրմանյան)։ Հայ եկեղեցում նույնպես շապիկի վրայից գործածվում են ուսանոցներ՝ թիկնոցի նմանությամբ (օրինակ՝ Երուսաղեմի և Կ. Պոլսի Հայոց պատրիարքարաններում և այլն)։ Միևնույն ժամանակ պետք է արձանագրել, որ դպրաց դասի շապիկները հիմնականում կարված են ուսանոցի հետ միասին, և սովորաբար լամբն ու թիկունքը զարդարված են գեղեցիկ նախշերով, խաչերով կամ պատկերներով։

Եղիշե սրկ. ՍԱՐԳՅԱՆ
Սիրանուշ ԱՂՅԱՆ

ՔՐԻՍՏՈՆՅԱ ՅԱՅԱՍՏԱՆ

Կրոնական, մշակութային, լրատվական երկշաբաթաթերթ

Հիմնադիր՝

Մայր Աթոռ Սուրբ Էջմիածին

Հրատարակիչ՝

«Քրիստոնյա Հայաստան»

թերթի խմբագրություն

Գլխավոր խմբագիր՝

Նարինե Հովհաննիսյան

Գրանցման վկայական՝ 624

Խմբագրության հասցեն՝

Մայր Աթոռ Սուրբ Էջմիածին

Հեռախոս՝ (010) 517 280

Էլ. փոստ՝

qristonyahayastan1@gmail.com

qristhay@etchmiadzin.am

web կայք՝

krishayas.wordpress.com

etchmiadzinlibrary.am/en/

kristonya-hayastan

Ստոր. տպագր. 16.06.2025 թ.

Տպաքանակը՝ 1265